

Ẹkwo-ozì Kẹ Mbù, Pọlu Deru Nù Ndu Kọrentu

1 ¹Ọwaa bụ ẹkwo-ozì, mụbe Pọlu ede; mbù onye ono, Kéreshi Jizọsu kuru bya emee ya ọ bụru onye-ishi-ozì iya. Ọ bụru g'ọ bụ uche Chileke bụ ono. Onye mu l'iya tukurù ede ẹkwo ono bụ nwanna anyi, bụ Sosutenisu.

²Ndu eede iya anụ bụ ndu Chìochi kẹ Chileke, bụ ndu ọphu nọ lẹ Kọrentu; gude iya ekele unubẹ ndu Chileke doberu iche g'unu bụru ndu dū nsọ opfu l'unu lẹ Jizọsu Kéreshi tųgbaru bụru nanụ. Eedekwa iya phọ anụ onyemonye, nọ l'ẹkameka, bụ ndu abajẹru Nnajiuphu anyi, bụ Jizọsu Kéreshi ẹja. Jizọsu ono bụ Nnajiuphu phẹ bya aburu Nnajiuphu anyịbedua kwaphọ.

³Gẹ Chileke, bụ Nna anyi; mẹ Nnajiuphu anyi, bụ Jizọsu Kéreshi meeru unu eze-iphe-ọma; mekwaaphọ gẹ nchị dū unu doo.

Ekele k'iphe-ọma, shi l'ẹka Kéreshi

⁴Mu anọduje ekeleru unu Chileke mu ekele k'eze-iphe-ọma, o shi l'ẹka Kéreshi Jizọsu emeru unu. ⁵L'unu lẹ Kéreshi tųgbaru bụru nanụ; unu shi ẹgube ono baa eze l'iphemiphe, shi iya l'ẹka. Unu tųko opfu ọnu magbuaru tųko mmamiphe magbuaru. ⁶Ozi kẹ Kéreshi ono bẹ e mewaru ọ nọshia unu ọkpobe ike l'obu; ⁷k'ọphu bụ l'ọ tọ dudu iphe, bụ iphe Unme Chileke anụ anunu mẹ nanụ, duru ọphu duru unu ọko; mbù g'unu nọ ngabẹ teke Nnajiuphu anyi, bụ Jizọsu Kéreshi a-lwa azụ goshi onwiya l'ọdu-biribiri iya. ⁸Jizọsu ono e-me unu g'unu shihu dųngu dųngu nno jasụ l'ikpetemazu. Ọo ya bụ; g'ọ tọ dū ẹka aata unu ọta mbọku ono, Nnajiuphu anyi, bụ Jizọsu Kéreshi e-kpe ikpe ono. ⁹Chileke apfushijekwa ike l'iphe, o pfuru. Ọ bụru Chileke ono bẹ kuru unu g'unu lẹ Nwa iya, bụ Jizọsu Kéreshi bya bya aburu nanụ gbarụ mgba l'iphemiphe; mbù onye bųhukwapho Nnajiuphu anyi ono.

Ekwo, dù lẹ Chìochi

¹⁰Sù-a; ọ kwa Nnajiuphu anyi, bụ Jizọsụ Kéreshi bẹ mu nọ l'ẹka arwọ unubẹ unwunna anyi sù g'unu wùje ọnu nanù g'unu hakọta l'iphemiphe, bụ iphe unu epfu. Ọo ya bụ g'ekwo ta adù l'echilabọ unu. Unu tũgbakwa bũru nanù ọkpobe abũru. G'egomunggo bũru unu nanù; idzu unu abũ-jeru nanù. ¹¹Unwunna mu; l'iphe, mu epfu ono bũkwa lẹ ndibe Kuloyi byaakwaru akọoru mu kọ-rwuaru mu iya alì sù l'unu kwarù lẹ ntũmego. ¹²Mbù l'iphe, mu epfu bụ l'a sũru l'unu anọduje adzọkashi iya. Onye ọphu asù lẹ ya larù Pọlu; onye asù lẹ ya larù Apọlosu; onye asù lẹ ya larù Pyi-ta; onye asù l'ọo Kéreshi bẹ ya larù. ¹³?A gbenu keshiwa Kéreshi ekeshi? Bù Pọlu bẹ apfugburu l'oswebe l'iswi ẹhu unu? Tọo ?bù ẹpha Pọlu bẹ e gude mee unu baputizimu?

¹⁴Mu ekele Chileke ekele l'ọ -tọ bụ Kirisupọsụ yẹ Gayọsụ mẹ mu asù l'ọ tọ dudu g'unu ha mẹ onye lanù mu meru baputizimu. ¹⁵Ọo ya bụ g'ọ tọ dù onye a-sù l'e gude ẹpha mu mee ya baputizimu. ¹⁶Aa! Ndu mu mẹfuru baputizimu bụ Sutifanasu yẹ ndibe iya. O to doduru mu ẹnya l'ọ dũbaaru ndu ọzo, mu meru baputizimu abudu ndu ono. ¹⁷Kéreshi ta abũ-kwa baputizimu bẹ o yeru mu gẹ mu bya emeje. Iphe, o ziru mu gẹ mu bya emeje bũkwa gẹ mu zije ndiphe ozi-ọma ono. Gẹ mu te egudekwa opfu, egoshi mmamiphe ndiphe zi iya; a -nonyaa ọ tũrwua ike, dù l'anwũhu, Kéreshi nwũhuru l'oswebe.

Kéreshi bụ ike bya abũru mmamiphe, shi l'ẹka Chileke

¹⁸L'ọpfu k'anwũhu Kéreshi l'oswebe ono bẹ bũkwa iphe-eswe l'ẹnya ndu ala l'iswi; obenu l'anyibe ndu a dzọtaru bẹ ọ bụ ike, shi l'ẹka Chileke. ¹⁹L'e dekwaru sù:

“Mmamiphe ndu maru iphe
bẹ mu e-mebyishi
emebyishi!

Mu emee nkwa menya ndu
manũkaru iphe
l'ọ bũru iphe-mmanũ.”^a

²⁰Sù-a; ?bũhunu awe bẹ ndu mmamiphe pfuru nta? ?Bù awe bẹ ndu edeje ẹkwo pfuru? ?Bù awe bẹ ndu maru opfu lẹ mgboko-a pfuru? ?Chileke te emeadaru gẹ mmamiphe, ndiphe bũru iphe-eswe?

²¹A makwarũ-a lẹ Chileke meru nemadũ k'ọphu oo-shi lẹ mmamiphe, ọ nũru iya maru iya; obenu lẹ nemadũ te egudedu iya maru iya. Noo g'ọ shita-ru Chileke sù lẹ ya e-shi l'iphe ono, ndu maru iphe sũru l'ọ bụ iphe-eswe ono, bụ iya bụ k'ọzi-ọma ono, anyi ezi ono; gude dzọo ndu kwetarũ nũ. ²²Ndu Jiu bẹ bụ

^a 1:19 Gũnaa Azá 29:14.

iphe-ohumalenya bẹ ẹphe sūru g'e goshi pẹ; ndu Gurisu bukwanuru mmamiphe bẹ ẹphe acho. ²³Obenu l'iphe, anyibedua ezi ozi iya bụ l'a kpopyaberu Kéreshi l'oswebe. Ono bụru ụp̄fu, ad̄u ndu Jiu l'okpa; bya aburu iphe-eswe l'anya ndu abudu ndu Jiu. ²⁴Obenu lẹ ndu Chileke kuru; mbụ ndu Jiu mẹ ndu abudu ndu Jiu; bẹ Kéreshi ono bụ ike Chileke bya abukwarupho mmamiphe shi l'eka Chileke. ²⁵L'iphe, Chileke eme; ọ d̄u ẹhu-eswe ẹhu-eswe; gbekwa ka mmamiphe ndiphe shii; tẹme iphe, gbẹ d̄u g'ọ bụ Chileke arwuhu kakwapho unwu-eliphe ike.

Ge Chileke emeje iphe iya

²⁶Ọo ya bụ lẹ-a; unwunna mu; unu nyatajekwa iphe unu shi buri tẹme Chileke kua unu. Unu te eshidu d̄u igwe marwua iphe gẹ ndiphe, maru ekwo amajeru iya; ophu unu eshidu d̄u igwe nweru ẹnya; ophu ndu shi l'oke amadu eshidu baa ishi. ²⁷Obenu lẹ Chileke hotaleru-a iphe, d̄u ẹhu-eswe ẹhu-eswe l'anya ndiphe; gude mee ndu maru iphe iphe-iphere. Ọ bya ahotakwapho iphe, rwuhuru arwuhu l'anya ndiphe; gude mee ndu okpehu d̄u iphe-iphere. ²⁸Chileke hotaru iphe, ẹnya lwaru l'eliphe; mbụ iphe, ndiphe agubeduru iphe, iphe, ẹphe sūru l'ọ t̄o d̄u iphe, ọ bụ; ọ hota iya gude mee iphe, ndiphe riru l'ọ bụ okpobe iphe g'ọ t̄o d̄u iphe, ọo-bụ. ²⁹Ọo ya bụ g'ọ t̄o d̄u nemadzū, e-je aba abaa l'iphu Chileke. ³⁰Obenu l'unubedua bẹ Chileke mewaru unu lẹ Kéreshi Jizosu tugba buri nanu; tẹme ọ byakwapho emee ya; ọ buri mmamiphe k'anyibedua. Ọo ya bẹ o shi l'eka; ọ buri iya bụ l'anyi aburu ndu p̄uberekoto l'iphu Chileke. Anyi shi iya l'eka buri ndibe Chileke; bya aburu ndu a gbataru l'iphe-iji, pyitaru anyi l'ekpiri. ³¹Ọo ya bụ g'ọo-buru iphe, ekwo-opfu Chileke pfuru sū: “Onye ọ d̄u g'ọ baa abaa; g'onye ono nodu Nnajiuphu l'eka ba iya.”

Kéreshi l'oswebe

2 ¹Sū-a; unwunna mu; teke mbụ ono, mu byapfutaru unu bya unu ezi ozi-oma kẹ Chileke ono, a makharu l'ọ bụ okpobe-opfu ono; mu te egudekwa opfu mecha mecha zia ya unu; ophu mu abyakwaru unu egoshi lẹ mu nwuru ekwo buri ọ-maru-ọ-machata. ²Lẹ mu pfukpoakwaru sū lẹ mu e-mekiritakporo l'echilabo unu g'ọ t̄o d̄u iphe, mu maru; gbahaa Jizosu Kéreshi kpeekpu, bụ iya bụ onye a kpopyaberu l'oswebe. ³Ozo bụ lẹ teke ono, mu l'unu shi nodu ono bẹ ike adudu mu; tẹme ndzū shi nodu agu-shikwa mu pho ike; tẹme ẹhu shi etehukwa mu pho etete shii. ⁴Ophu iphe, mu pfuru epfupfu mẹ ozi, mu ziru ezizi, abudu iphe, mu gude ire mecha mecha k'opu manukarunu pfua geeshi g'ee-kweta iya. Ọ chia iphe, meru nū bụ lẹ mu goshiru unu l'ọo Unme Chileke yee ike kẹ Chileke ere ire l'opfu ono; ⁵k'opu ekwekwe, unu kweru kẹ Kéreshi tee shidu lẹ mmamiphe nemadzū; g'ọ shichia l'ike kẹ Chileke.

Mmamiphe Chileke

⁶Ọle-a; ọ bujekwaru-a; mu lẹ ndu kawaru ẹnya l'iphe kẹ Unme Chileke nodu epfu; mu egude mmamiphe epfu eyeru pẹ. Ọle ọ t̄o bukwa

mmamiphe ọphu shi l'ẹka ndiphe; ọphu ọ bukwa mmamiphe ọphu shi l'ẹka ndu eze ndu mgboko l'ọphu; ẹphebedua bẹ Chileke emewaa ike phe g'ọ buru iphe-mmanu. ⁷Mmamiphe ọphu mu egudeje epfu bukwa mmamiphe ọphu Chileke shi domia edomi; mmamiphe ọphu o meru gẹ ndiphe ta ama. Mmamiphe ono bu lẹ Chileke tubuhakpọwaruro tẹme o mee mgboko; l'anyi l'iya a-gbaru mgbal'ọdu-biribiri iya. ⁸Mmamiphe k'ono ta adukwa ndu bu ndu-ishi lẹ mgboko-a mgburugburu maru iya nu. Ome ẹphe maru iya; m'ẹphe te eje akpopyabe Nnajiuphu ono l'oswebe; mbu Nnajiuphu ono, yẹ Chileke gba mgbal'ọdu-biribiri iya ono. ⁹Obenu l'ederu l'ekwo-opfu Chileke su:

“Iphe ẹnya ahumajeduru;
 ọphu nchi anumajeduru
 iya;
 ọphu ọ dudu onye
 egomunggo rwujeru
 l'oo-mee;
 bẹ Chileke meru doberu
 ndu yeru iya obu.^b”

¹⁰Chileke gbewa l'ẹka Unme nkiya goshi anyi iphe ono, o shi domia edomi ono. Lẹ Unme Chileke avofutajekwa iphemiphe, bukpo iphe, e domiru edomi je akpachaa l'idzu, Chileke chiruro lime obu iya k'ememe dobe. ¹¹Lẹ-a; ?bu onye maru iphe no nwibe iya l'obu? ?Tobudu o nonu maru iphe, du l'obu nkiya. Nokwapho g'ọ to dudu onye maru iphe, no Chileke l'uche a -gufu Unme Chileke. ¹²Su-a; ọ to bukwa unme ndiphe bẹ anyi nataru; ọ kwa Unme, shi l'ẹka Chileke bẹ anyi nataru, bu iya bu Unme, l'e-mekwanu g'anyi makotaru iphe-oma, Chileke meshiru anyi.

¹³Oo ya bu lẹ-a; l'ọ to bukwa opfu, e gude mmamiphe ndiphe zia anyi bẹ anyi egudeje epfu iphe ono. Iphe, anyi egudeje epfu iya bukwa opfu, Unme Chileke ziru anyi. Oo ya bu g'anyi ewojueru okpobe-opfu, shi Unme Chileke l'ẹka akoru ndu Unme Chileke bu l'ehu g'ọ doo phe ẹnya. ¹⁴Onye Unme kẹ Chileke ta anodu l'ehu ta anatajekwa iphe, shi l'ẹka Unme Chileke; kele iphe ono aduje iya ehueswe ehueswe lenya. Teme ọphu o dojedu iya ẹnya eshinu ọ to byadu amaru urwu iya me ọ budu lẹ Unme Chileke, no lime iya eyeru iya ẹka. ¹⁵Obenu l'onye Unme Chileke bu l'ehu; amaju ru urwu iphemiphe; ọphu nemadzu mmanu adujekwanu ike maru iphe onye ono eme. ¹⁶Oo ya bu iphe, e deru l'ekwo-opfu Chileke su:

“?Bu onye maru uche
 Nnajiuphu, bu Chileke?
 ?Bu onye bẹ bu onye adu
 ike kaju iya iphe,

^b 2:9 Gūnaa Azá 64:4.

oo-me?^c

O bekwany l'anyibedua nweru uche ke Kéreshi, bu iya emeje g'anyi ri ori-ri g'ori.

Ndu ejeru Chileke ozi

3 ¹Unwunna mu; mu ta adukwa ike pfuaru unu opfu, eepfuru ndu Unme Chileke bu l'ehu. Opfu, mu pfuru unu bukwa opfu, eepfuru ndu emekwadu umere ndiphe; mbu ndu bukwa ndu nwaswa l'iphe ke Kéreshi. ²Noo g'o gude mu chee unu era; ophu mu ededuru unu nri eshinu unu eshidu suwaru k'eriri iya. Mbu le nta-a be unu teke asukpokwaa ya nu; ³kele unu emekwadu umere ndiphe. Eshinu unu ejikwadu iji-nya; teme unu nodu adzo-phe nya; bya anodu ekpa l'iche iche; ?unu ta amadu l'unu etsokwadu uzo ke ndu mgboko-a; l'unu emekwadu umere ndiphe. ⁴Leshinu unu atukoje epfugbaa su: "Mbèdua lakwaru Polu." Onye ophu asu: "Mbèdua lakwaru Apolosu." ?Unu ta amadu l'unu emekwadu umere ndiphe?

⁵Mbu-a; Apolosu ono; ?o bu onye? To Polu; ?o bu onye? O to dukwa ndu ozo, anyi bu gbahaa ndu ejeru Chileke ozi; ndu goshiru unu uzo, unu shiru bya eworu onwunu ye Jizosu l'eka. G'anyi ha nwekotaru iphe, Nnajiuphu suru g'anyi mee. ⁶Iphe, anyi meru dukwa gegube-a, aakuje akpuru oshi-a. O buru mbèdua be kuru akpuru oshi obu akuku; Apolosu gbaa ya mini. O bukwanuru Chileke bu onye meru g'o vua evuvu. ⁷Oo ya bu l'onye kuru akpuru oshi; me onye gbaru iya mini ta adukwa iphe, ephe pfube buru. O kwa onye bu iphe bu Chileke, bu iya bu onye meru iya g'o vua. ⁸Onye kuru iphe akuku me onye gbaru iya mini tukokwaru eje ozi lanu. Ole g'ephe ha l'ehu l'ehu be Chileke e-bukwa nggo; onye jeru g'o jeru be oo-bu nggo g'ozi, o jeru gbaru. ⁹L'o kwa Chileke be anyi l'iya tukoru gbaru mgba eje ozi ono. Unubèdua bu opfu, Chileke koru bya aburu ulo, Chileke akpu. ¹⁰Mu gude iphe-oma, Chileke yeru mu l'eka ge mu gude jeeru iya ozi mee iphe, onye maru akpu ulo okpobe akpukpu emeje. Mu turu okpa-ulo; onye ozo nodu akpukwanu ulo obu akpukpu. Ole g'onye akpu g'ookpu; letakwa nya maru iphe, ookpu l'eli okpa-ulo obu. ¹¹Noo kele o to dukwa onye ozo, atubaa okpa-ulo ozo abudu ophu a tuwaru, bu iya bu Jizosu Kéreshi. ¹²L'eli okpa-ulo ono be o duru ndu e-gude mkpola-ododo akpu iya ulo; ndu egude ope; ndu egude mkpuma, aswa du; o dukwarupho ndu bu oshi be ephe e-gude akpu nkephe; ndu egude eji; ndu abukpooruro eta be ephe e-gude akpu nkephe. ¹³Obenu l'onnyemone be aa-maru g'iphe, o gude kpua nkiya du-be ree mboku ikpe ono, Chileke e-woru iya tua jala onoya. L'oku, e-tsu mboku ono be bu o -tsuchaa; aa-huma ozi, onnyemone jeru iphu. Oku ono e-tsu iya hua ya

^c 2:16 Gúnaa Azá 40:13.

ama goshikwanu g'ọ gbaru. ¹⁴Onye ọku ekeduru iphe, o gude kpua ọlo l'eli ọkpa-ọlo ono; Chileke ebua ya nggo. ¹⁵Onye ọku keru nkiya; l'ọolaaru iya l'iswi; yẹbedua l'ishi onwiya b'aa-dzotakwa-a; ọle adzota nkiya a-duta-bewa g'onye a lofutaru l'ọku enwunwu.

¹⁶?Unu ta amadu l'unu bu eze-ulo Chileke; le Unme Chileke be bu ebu-bu l'ime unu? ¹⁷Onye emebyi eze-ulo Chileke be Chileke e-mebyikwapho. Leze-ulo Chileke dukwa nso; o buru unubedua gedegede bu eze-ulo iya obu.

¹⁸G'ọ to dukwa g'unu ha onye anoduje agho-pheru onwiya ugho. G'onye arị le ya maru iphe l'ogbo owa-a; hakwaa egube oriri ono bya aburu onye-eswe; e -mechaa g'ọo-buru onye maru iphe okpobe amaru. ¹⁹Kele iphe, ndiphe guberu mmamiphe le mgboko-a be bukwa iphe-eswe l'iphu Chileke. Le dekwaru lekwo-opfu Chileke su: "Oo Chileke bu onye anmataje ndu kwaru enya le nkwaanya phe." ²⁰A bya edekwaa ya pho lekwo-opfu Chileke su: "Nnajiuphu makwaru-a l'egomunggo ndu maru iphe bu mkpokpo iphe." ²¹Oo ya bu; g'ọ to dukwa onye e-gudeje nemandzu aba abaa. Le -pfujekpo ya nu epufufu; iphemiphe tukokwaru buru iphe unu iphe unu; ²²me Polu-o; me Apolosu-o; mekpoo Pyita-o; mgboko l'ophu; me ndzu me onwu. Iphe nta-a me iphe e-me l'iphu; iphemiphe ono tukoru bukotaru iphe unu. ²³Unubedua tukokwanu bukotaru iphe ke Kereshi; Kereshi bukwanuru ke Chileke.

Iphe ndu-ishi-ozu Kereshi egoshi anyi

4 ¹Su-a; unu te edobejekwa anyi g'anyi bu ndu ozo gbahaa ndu-ozu Kereshi; ndu Chileke yeru g'ephe letaje enya l'opfu Chileke ono, bu opfu ophu Chileke shi domia edomi ono. ²Iphe, eele enya iya leka onye eleta ndu-ozu enya bu g'ọ buru onye e gude ire iya aka. ³Mu ta akpakwa ishi l'unu doberu mu nno; ozo le nemandzu kperu mu ikpe k'ozu, mu jeru; mbedua l'onwomu ta adukpokwanu teke mu suseru l'o waa ge mu du; ⁴o noo kele o to dudu iphe, mu humaru onwomu lehu, bu iphe, mu a-su l'o noo aka mu shiswewaru uzo; ọle o to bukwa iphe ono goshiru le mu kpe-fuwaru. Oo Nnajiuphu bu onye e-kpe mu ikpe. ⁵Oo ya bu g'unu ta adushi onye unu a-odu anmawa ikpe lebe oko rwu teke aa-nma ikpe; ikpe bu teke Nnajiuphu a-bya; l'o kpee ya. Noo teke oo-wofuta iphe, e shi domia l'ochii bya edobe l'iphoro; l'o bya eworu iphe, amadu chiru k'ememe, bu iphe, du iya lokpoma; woru tua jala. Noo teke Chileke a-ja onyemonye ajaja, rwuberu iya nu.

⁶Unwunna mu; o kwa g'e-shi g'o doo unu enya be mu gude woru iphemiphe ono dobe lehu mu le Apolosu; g'unu anwuta iphe ono, e pfuru su: "Unu te etsoghatajekwa iphe, e deru lekwo-opfu Chileke." Su-a; g'ọ to dukwa g'unu ha onye egudeje onye lanu eku onwiya; woru onye ophu nmaa phulaphula. ⁷Su-a; ?bu onye mekpooru ngu i ka onye ozo? ?Bu gunu be i

nweru 'abūdu iphe, Chileke nūru ngu? Eshinu ọ bụ Chileke nūru ngu iya; ?denukwanu g'ọ gude ị gbẹ gude iya eku onwongu g'ọ -bụ l'ọ tọ buedu iphe, a nūru ngu anūnu?

⁸Epho gbẹ jichaakwanu unu! Unu gbẹkwa nwekotawaru nū iphemiphe; buchwawaru nū ndu eze; ebe anyi bedua abūdu. Ọ dukwa ree. Ọ gbẹkwanu dū mu g'a sū l'unu buchwawaa eze ọbu; mē anyi abya g'anyi l'unu tūko buru iya. ⁹Obenu l'ọ dukwa mu g'anyi be ndu-ishi-ozī Kéreshi bē Chileke woru dobe l'ikpazu. Anyi nōwaa gē ndu e doberu k'apfū-gbu; mbū g'anyi buru iphe, mgboko mgburugburu, a-byajē ahūma ahūma; mbū ndiphe mē unwu-ọjōzi-imigwe. ¹⁰Anyi gude opfu ẹhu Kéreshi buru ndu eswe; unubēdua gbẹwanu l'eka Kéreshi buru ndu maru iphe. Anyi dū arwūhu; obenu l'unubēdua gbenu shihu ike! Anyi bụ ndu a nmaru phulaphula; obenu l'unubēdua bē a gbẹ kwabē ùbvù. ¹¹Sū-a; ẹgu anọdujekwa agū anyi; mbūkwa byasu nta-a; ẹgu mini nọdu anọduje agū anyi; anyi nọdu anma nkirika ẹkwa; a nọdu etsu anyi iphe; anyi tsoru ẹkameka aghaphe; ọphu anyi enwedu unuphu. ¹²Anyi gbẹ gude ẹka anyi ese akanya g'anyi e-meje anū onwanyi nri. Teke a tūru anyi ọnu; anyi agoru ọnu-oma nū onye ọbu. A -nọdu akpa anyi ẹhu; anyi ataru iya nshi. ¹³Teke e pfubiyishiru ẹpha anyi; anyi epfuru opfu bebelebe nū onye ọbu; anyi gbẹ bya abūwaru ikpōzu kē ndiphe; mbū iphe, dū ideyideyi, e gude ẹza zafu l'ekameka; byasu l'eswe, dū gē ntanu-a.

¹⁴Iphe, mu ederu unu iphe-a ta abūkwa g'ọ mee g'iphere dū unu. Ọ kwa ẹka bē mu aloru unu lē nchi; l'unu bụ unwu mu, mu yeru obu. ¹⁵L'unu -nwechakpokwaaru m'obeta ọ buru unubuku ndu eleta unu ẹnya l'uzo kē Kéreshi; nna unu ta adūkwa igwerigwe. Ọ kwa mbēdua bụ nna unu, nūru unu ndzū, shi l'eka Kéreshi; eshinu ọ bụ mbēdua byaru ezia unu ozi-oma ono. ¹⁶Noo g'ọ gude mu nọdu arwọ unu arworwo sū; jiko unu tsoru ẹka mu. ¹⁷Ọ kwa iphe ono meru g'ọ gude mu zia Timoti sū g'ọ byapfuta unu. Timoti ono bē eshinu mu ziru iya etso Nnajiuphu bē ọ būwaa nwa mu, mu yeru obu; tēme ọ buru onye goshiwaru lē ya gbaru gē mu gude ire iya ẹka. Sū-a; g'ọ byapfuta unu bya anyatabaaru unu gē mu egudeje etso ọzo kē Kéreshi ono; mbū gē mu ezije iya l'iphe, bukpo Chiochi g'ọ ha l'ekameka.

¹⁸Ọ dūru ndu gbẹ hawaru nū eku onwophe; g'ọ bụ lē mu ta abyadu alwaba azū lē ndu-unu. ¹⁹Ole a taa nọdu ọdu; mu abyapfuta unu; mē Chileke kwenu. Noo teke mu a-hūma iphe, ndu ono, eku onwophe ono a-dū ike mee; tōo ephe bụ ọ-pa-ọnu. ²⁰L'iphe, bụ lē Chileke bụ eze ta abūkwa opfu, eepfu l'ọnu; ọ kwa iphe, gude ike ere ire. ²¹?Bū ole ka unu ree? ?Mu gude ẹchachi byapfuta unu? ?Tōo gē mu gude obu-iphóró waa ewoze onwonye alí bya?

Urwu-ali, haru dū lē Chiochi

5 ¹Sū-a; mu anūkwa l'unubē ndu Chiochi haru arwū urwuali. L'ejo urwuali, unu haru arwū dū-be eji; k'ọphu bụ lē ndu 'amadū ekemu

Chileke ta atukpodanu ama ememe iya; ke ge nwoke duta nyee nna iya wata alulu. ²Unu nodu ekukwapho onwunu; o buru iphe, unu gege agbe agu aphu. Unu wuchikwaa onye ono ewuchi; g'o to noduhekwa l'echilabo unu. ³L'a makwaru-a le mu ta anodu l'eka unu no; k'ophu unu ele mu enya; obenu l'obu mu nokwa-a l'eka unu no. Noo g'o gude mu gude ike ke Nnajiuphu anyi, bu Jizosu Kereshi nmaa onye ono, meru ebyi ono ikpe g'o bu le mu l'unu no l'eka ono. ⁴Su-a; unu -nokobeepho; teke ono obu mu anodukwapho l'eka ono, unu no ono; ike ke Nnajiuphu anyi, bu Jizosu a-nodukwapho l'eka ono, anyi no ono; ⁵unu woru onye ono ye Nsetanu l'eka g'o mebyia ogwehu iya; l'o noo iphe, gbaru iya nu bu ono. Oo ya bu ge Chileke a-dzoo ndzu iya mboku, Nnajiuphu a-bya.

⁶Su-a; ekuku, unu eku onwunu ta adukwa ree. ?Unu ta amadu l'oo nwochileka iphe, ekoje buredi be asujeru ekoli ishi buredi ophu? ⁷Unu to nwehu sashia akahu iphe-ekoje-buredi ono, g'unu aburu buredi ophuu, e te eyeduru iphe, ekoje buredi. Noo kele nwaturu Ojegahata ono, bu Kereshi be e gbuakwaru. ⁸Nta-a buakwaa g'anyi wata abo obo-iphe ono g'o gbaru. G'anyi te egudekwa buredi ophu akahu iphe-ekoje-buredi ono du, bu iya bu ejo-iphe yee iphe-ashi gude bo ya. O kwa g'anyi gude buredi ophu iphe-ekoje-buredi adudu ililekpoo bo ya, bu iya bu anodu ndzu ophu ntucha adudu ilile waa l'eme ire-lanu.

⁹Mu dehaakwaru unu ekwo su unu g'unu le ndu eme ke nwoke me ndu eme ke nwanyi te emegbajekwa. ¹⁰Ndu mu epfuru unu ta abukwa ndu 'amadu Chileke, eme egube iphe ono; ozoo l'oo ndu enya-pfurupfuru; ozoo ndu ana nfu; ozoo ndu agwo nshi. Ndu k'ono be unu -jeshia phe ezeru; buanaa iphe, gbaru unu l'ememe bu g'unu lufuepho le mgboko alufu ophu. ¹¹Iphe, mu shi epfu bukwa g'unu bujeru ubara yeru onye kuru onwiya nwanna teme o gbem eme ke nwanyi; ozoo eme ke nwoke; ozoo nweru enya-pfurupfuru; ozoo l'oo gw'o nshi; ozoo l'oo onye evu onye ozo nvu azu; ozoo l'oo onye angugharu mee eka; ozoo onye ana nfu. Oo egube onye ono be mu sukwarupho g'unu l'ia te erigbajeshi nri.

¹²O -buru ke ndu amadu Jizosu; ?nkemu bu l'ole; k'eje phe anma ikpe? ?Tobudu ndu ophu no l'ime Chiochi be o gbaru anyi l'ekpe ikpe? ¹³Obenu le ndu ophu anodu l'ime Chiochi bu Chileke e-kpe phe ikpe. Oo ya bu le-a; "Unu chifujekwa onye njo l'echilabo unu."

Agbaru unwunna ekwo

6 ¹?Denu g'o gude o nodu abujeru teke o bu l'o nweru g'unu ha onye opfu adaru yee nwibe iya; l'o gbem paru iya jepfushia ndu apfubeduru eka oto g'ephe kpee; ephe ta apafudu iya ndu-ns'o ibe phe? ²?Unu ta amadu l'oo unube ndu-ns'o bu ndu e-mechaa kpee ndiphe l'ophu ikpe? Eshinu o bu unu e-kpe ndiphe l'ophu ikpe; ?unu ta akabedu suru ekpe unwu iphiriba ikpe onoya? ³?Unu ta amadu l'oo anyibedua be l'e-mechaa

kpee unwu-ojozi-imigwe ikpe? Ọ bụchiaru nū opfu k'eliphe bẹ unu ta adūdu ike kpeshia. ⁴Ọ -buru l'egube opfu ono dūru unu; ?denu g'o gude unu gbẹ ewotajẹ iya eje edoru ndu unubẹ Chiochi sūru l'ọ tọ dudu iphe, ephe bụ? ⁵Iphe, mu gude epfu iphe-a bụ g'iphere iya dū unu. ?Tọ dukpo-daa g'o ka mma l'ọo onye lanū l'echilabọ unu; bụ onye maru iphe k'ophu odojeru unubẹ unwunna ono opfu? ⁶Ọ gbẹ abujeru nwanna -gbeshi l'ooje agbaarū nwanna iya ekwo l'iphu ndu ta amadū Chileke.

⁷Agba ekwo ono, unu anọduje agbaru nwibe unu ono buakwaa iphe, dū eji bẹ unu anọduje emeta ekpu onwunu. O shitachia ono; ?bū gūnu kparū iphe, unu ta adūjedu ike taa nshi mẹ e -mee unu eji? ?Tọ kachidaa ree g'ọ bụchiaru l'ọo unubedua bẹ onye ọzo gbẹchia gude ụgho emekputa? ⁸Unubedua l'onwunu gbẹ anọduje eme nwibe unu eji; gude ụgho eme nwibe unu iphe, apfuduru-oto; l'eka nwibe unu ono bụhukwapho unwunna unu. ⁹?Unu ta amadū lẹ ndu apfubeduru-eka-oto bẹ ụzo adūduru l'eka Chileke bụ eze? Unu te ekwekwa g'e duru unu ghaa ụzo. Ndu ụrwuali; mẹ ndu agwo nshi; mẹ ndu eri ogori; mẹ onye nwoke arajẹ nwoke ibe iya; ¹⁰mẹ ndu-oshi; mẹ onye ẹnya-pfūrufuru; mẹ ndu angughajeru mē ẹka; mẹ ndu evuje nvu azu; mẹ ndu ana nfu; ta adukwa g'ephe ha mẹ onye lanū, abahū l'eka Chileke bụ eze. ¹¹Ọ buru g'unu shi harū dūchaa bụ onoya. Obenu lẹ Kéreshi safūwaru unu iphe-eji unu; bya emee unu ndu kẹ Chileke, dūeberu Chileke ree. Ọ buru l'eka Jizosu Kéreshi, bụ Nnajiuphu waa l'eka Unme-dū-Nsọ bẹ Chileke shi gua unu lẹ ndu pfuberekoto l'iphu iya.

Èhu ngu l'ophu bụ kẹ Chileke

¹²“Iphemiphe bẹ a harū mu ụzo gẹ mu meje g'ọ dū mu.” Ọlẹ ọ tọ bụkwanu iphemiphe bẹ bụ mu -mee ya l'ọ dūru mu lẹ ree. “A harū mu ụzo gẹ mu meje iphemiphe g'ọ dū mu.” Ọlẹ mu tee kwekwanū g'ọ dūru iphe, e-wota mu mee gẹ mu buru ohu iya. ¹³“Nri bẹ e mekwarū g'ọ lajẹ l'epho; bya emee ephe gẹ nri lajẹ iya.” Ọlẹ Chileke e-mechakwanaa tūko ephe-nebo mebyia. Iphe, Chileke medoru ogwehū ta abukwa g'e gude iya pharwushije onwonye; ọ kwa Nnajiuphu, bụ Jizosu bẹ o medoru iya; tēme Nnajiuphu l'onwiya bukwarupho Nnajiuphu k'ogwehū. ¹⁴Chileke kuliru Nnajiuphu o shi l'onwu teta dzuru ndzū; ọ bukwarupho nno bụ g'oo-gude ike iya kulia anyibedua.

¹⁵?Ọ dū g'unu ta amadū l'ogwehū unu bụ mpfukata ehū Kéreshi? ?Denu gẹ mu a-gbẹ wota mpfukata ehū Kéreshi jeye l'ehū nwanyi ụkpara? Tūswekwa! ¹⁶?Unu ta amadū l'onye jepfuru nwanyi ụkpara bẹ yẹ l'iya tūgbawaru buru onye lanū? Eshinu e pfuru sū: “Ephenebo l'a-buru onye lanū.” ¹⁷Obenu l'onye yē Nnajiuphu, bụ Jizosu tūgbaakwanaru bẹ yẹ l'iya buakwapho onye lanū lẹ Unme Chileke.

¹⁸Unu buru ụbara yeru apharwushi onwonye. Iphe, bukpo iphe-eji ọzo, eemekpoo ememe ta adukwa ophu emebyi anū-ehū nemadzū;

obenu l'onye apharwushi onwiya l'emebyi anụ-ẹhu iya. ¹⁹Unu ta amadu l'ogwehu unu bu eze-ulo ke Unme-du-Nso ono, bu l'ime unu ono; mbu Unme-du-Nso ono, unu nataru l'eka Chileke ono? Noo g'o gude ebe o buedu unu, nwe onwunu. ²⁰Unu buwaa aswa, Kereshi zuru azuzu. Oo ya meru g'o gude unu je l'egude ogwehu unu ekutse Chileke.

A bya le k'alu nwanyi

7 ¹A bya abya le k'iphe ono, unu deru mu l'ekwo-ozu ono. Iphe, du ree bukwa ge nwoke te ejejeshi alu nwanyi. ²O buwaa g'o to me g'amadu wata eme ke nwanyi meru g'o gude mu su: ge nwoke l'ehu l'ehu lutaje nwanyi k'eka iya; nwanyi nonu eje aluru ji k'eka iya. ³Ge nwoke lajeru nyee ya l'ulo g'o gbaru iya eshinu oolu iya alulu. Nokwapho ge nwanyi a-lajeru ji iya l'ulo g'o gbaru iya l'oo ya bu ji iya. ⁴Le nwanyi, aalu alulu te enwekwa ehuru iya. O kwa nwoke nwe ehuru nyee ya. Nokwapho g'ehu ke nwoke 'abukwa iya pho nwe iya. O kwapho nwanyi nwe ehuru ji iya. ⁵Ge nwoke ta ajikajekwa ejepfu nyee ya; ophu nwanyi ajikajekwa ji iya; gbahakwa l'unu chiru iya achichi su l'oo g'unu haa onwunu ke nwateke ono; k'ophu unu e-woru uche dobe l'epfu anu Chileke okpobe epfufu. Ole teke unu tuburu k'epfu anu Chileke obu bukwapho; unu watakwa akwakwa ozo; o -nonyakwaa Nsetanu kwaru unu ye l'iphe, du eji opfu l'unu ta adudu ike esede onwunu.

⁶Ole iphe-a, mu epfuru unu-a bukwa kele mu kwetaru g'o du egube ono; o to bukwa l'oo ekemu, a turu atutu dobe. ⁷Le mu -jeshia epfufu; bukwa iphe, dukporo mbedua ree bu ga su l'onyemonye du-dzuru ge mu du-a; obenu l'onyemonye nwekotaru iphe-oma, du iche, Chileke seru ye iya l'eka; onye nkiya adu egube-a; onye ophu nkiya aduro g'oo-du.

⁸Su: o -buru ke ndu ta aludu ji me ndu ta aludu nwanyi; me unwanyi ophu ji phe anodedu; ndu k'ono be iphe, mu epfuru phe bu l'o duru phe ree g'ephe noduepho ta aluhe ji; ebe nwoke aluhe nwanyi; nodu ge mu no-a. ⁹Ole o -buru l'ephe taa dudu ike emekota iya; ge nwoke lukwaa nwanyi; ge nwanyi lukwaru ji. Lono kakwapho mma eme l'anodu taahaa nshi okpehu l'iphe, agushi phe ike.

¹⁰O be le ndu ophu aluwaanu be mu aturu ekemu su; ge nwanyi b'adukwa teke oo-lufuje libe ji iya. Mbu l'o to bukwa mu atu ekemu obu; o kwa Nnajiuphu anyi, bu Jizosu. ¹¹Teke o bukwanu l'o lufuru; ge nwanyi obu kwakwaa b'alu ji ozo; odumeka g'o laphukwa azu ge yele ji iya doshia. Ge nwoke ta adukwa teke oo-chifuje nyee ya.

¹²A bya le ndu ophu phoduru nu mu su-a; owa-a bukwa mu epfu iya; o to bukwa Nnajiuphu; teke o bu l'onye kweru ke Kereshi alu nwanyi, te ekwedu ke Kereshi; g'onye ono ta achifukwa iya me o -buru le nwanyi obu kweru-a le ye l'iya a-tuko-a nodu alu. ¹³O -bukwanuru l'oo nwanji, kweru ke Kereshi alu nwoke, ekwedu ke Kereshi; ge nwanyi obu ta

alufukwa l'ibe ji iya obu; me o -buru le nwoke obu kweru-a le ye l'iya a-nodu alu. ¹⁴Kele nwoke, ekwedu ke Kereshi bya alu nwanyị, kweru ke Kereshi be shiakwaa l'eka nyee ya buwaru ke Chileke. Nokwapho ge nwanị, ekwedu ke Kereshi bya alu nwoke, kweru ke Kereshi shiakwapho l'eka ji iya buwaru ke Chileke. O -bu lo to du nno me unwu unu phe abujeru ndu aso nso; obenu le nta-a be epe dukota nso. ¹⁵Teke o bu lonye ophu ekwedu ke Kereshi be suru le ya ta aluedu; g'o hakwaa. Onye nwoke ozoo nwanị kweru ke Kereshi ono be e tee kebutaekwa ekebuta; eshinu Chileke kuru anyi g'anyi buru le nchi-odu-doo. ¹⁶Mbu-a; gube nwanị, alu ji; ?denu g'ishiru maru l'e tee shidu ngu l'eka dzoo ji ngu? To ?denu ge gube nwoke meru maru l'e tee shidu ngu l'eka dzoo nyee ngu?

Aadu ge Chileke doberu onye

¹⁷Oo 'epho g'onyenonu mejeepho iphe, Chileke keru nu iya g'o meje; mejekwa iya pho ge Chileke suru g'o meje iya teke o kuru iya. Ono bu ekemu, mu atu edoberu iphe, bukpo Chiochi, no l'ekameka. ¹⁸Mbu l'iphe, mu epfu bu; g'onye buru ubvu teme e kua ya te ejeekwa eme onwiya onye e buduru ubvu. G'onye ebuduru ubvu te ejeekwa ebu ubvu. ¹⁹Kele e buru ubvu l'e te ebuduru te enweddu iphe, o bu l'iphu Chileke. Iphe, bu iphe bu g'e meje iphe, Chileke karu su g'e meje. ²⁰Oo ya bu g'onyenonu dujeepho g'o du teke Chileke kuru iya. ²¹Teke o bu li bu ohu teke Chileke kuru ngu; ta ayokwa oshi. Gbahakwa li maru uzo, ii-shi gbaa onwongu; g'i menaa ya nweru onwongu. ²²Lonye Chileke kuru; o bya ye Kereshi bya atugba; teke onye ono bu ohu; g'onye ono nyatakwa le Nnajiuphu towaru iya legbu, iphe-eji keru iya. Nokwapho g'onye 'abudu ohu teke Chileke kuru iya byawaru bya aburu ohu Nnajiuphu, bu Kereshi. ²³Unu buakwaa aswa, Kereshi zuru azuzu. Oo ya bu; unu ta laekwa azu je aburu ohu ke ndu mgboko-a. ²⁴Unwunna mu; g'onyenonu jiko dujeekwapho g'o du teke Chileke kuru iya; g'onye ono noduakwaro latugba, yeke Chileke tugbaru.

Ndu ata aludu alulu

²⁵A bya l'ehu k'unwanyi, ata aludu ji me unwoke, ata aludu nwanị; o to dudu ekemu, mu a-su le Nnajiuphu turu doberu unu. Obenu le mu e-ye onu, rwuberu mu nu; eshinu e shiwaa l'obu-imemini ophu Chileke aphuru mu; mu buru onye goshiwaru lo gbaru g'unu gude ire mu aka.

²⁶Oo ya bu l'iphe, mu arikuwa bu le ge mkpawere habe shii nta-a be iphe, kakwa ree bukuwa g'onyenonu noduerupho onwiya g'o no. ²⁷Teke jiluwa nwanị; ta achifukwa iya. O bukwannuru li ti luada nwanị; te jeekwa aluta. ²⁸Ole o to bukuwa eme iphe-eji me i -je alua nwanị. Teke o bukwannu le nwamgboko jeru je alua ji; o to bukuwa iya pho eme iphe-eji. O kwa l'iphe, o bu bu le ndu alu nwanị me unwanyi, alu ji be vu

iphe-ehuka kẹ mgboko-a l'ishi. Ọphu ọ dukwanu mu g'a sù l'unu dabaru l'iphe-ehuka, dù nno.

²⁹Mbù l'iphe, mu epfu unwunna mu; bù lẹ mbọku abvụakwa. Gẹ ndu alù nwanỳì shiepho nta-a metajẹkpoo g'ẹphe ta alùdu nwanỳì. ³⁰Gẹ ndu aphu tsoru metajẹkpoo g'ọ tọ dudu iphe, atsu phẹ l'ẹhu. Gẹ ndu ẹhu atso uto mejekpoo g'ẹhu ta atso phẹ. Gẹ ndu nweru aswa, ẹphe azu metajẹkpoo g'ọ tọ dudu iphe, ẹphe azu. ³¹Tẹme gẹ ndu emekpoo iphe, ẹphe eme lẹ mgboko-a metajẹkpoo g'ọ tọ dudu iphe, iphe ono bù. Lẹ mgboko-a, dù g'ọ dù-a ta adụekwa g'oo-nọ-beru.

³²Ọle iphe, mu eme gẹ mu karu unu bù g'unu haa ayọ-phe ọshi. Iphe nwoke, ta alùdu nwanỳì a-nodu epfu buẹpho gẹ ya e-me jeeru Nnajiuphu, bù Jizosu ozi, bù iya bù gẹ ya e-me meje iphe, jiru Jizosu ẹpho. ³³Obenu l'onye alù nwanỳì bẹ l'ayọ ọshi iphe mgboko, bù iya bù gẹ ya e-me meje iphe, jiru nyee ya ẹpho; ³⁴shi nno chita iphe labọ ari. Nokwaphọ gẹ nwanỳì, ata alùdu ji mẹ nwamgboko, ta alùdu ji dù bù onoya; iphe, ẹphe eyejeru ẹhu bukwapọ g'ẹphe e-me jeeru Nnajiuphu ozi; g'ẹphe e-me wota ẹhu phẹ mẹ ọriri phẹ doberu Chileke iche. Obenu lẹ nwanỳì, alù ji bẹ iphe, ọoyo ọshi iya bù ọshi iphe mgboko, bù iya bù gẹ ya e-me mee iphe, jiru ji iya ẹpho.

³⁵Sù-a; iphe, mu gude epfu iphemiphe-a bukwa lẹ mu eme gẹ mu yeru unu ẹka. Mu te emekwa gẹ mu sede unu. Ọ chikwaa iphe, mu eme bù gẹ mu mee g'unu meje iphe, pfulu nhamunha, gbaru unu l'ememe; g'ọ tọ dù iphe, a-nafuje unu egomunggo l'ẹje ozi Chileke ono.

³⁶Teke ọ bù lẹ nwoke, eje alù nwanỳì nonyaru bya emeahaa umere egoshi lẹ nwanỳì ono agushikpowa iya ike; tẹme nwamgboko ono kajiwaa akaji; ọ dūwaa nwoke g'ọ lụ ya; bẹ ọ dukwa ree g'ẹphe lụ. Ọ tọ bukwa iya eme iphe-ẹji. ³⁷Obenu onye obu shihuru ike; o gude obu iya pfua ya pfushia ya ike lẹ yee ya taa kwadụ; kele ọ maru l'ọ tọ tsudu iya l'ẹhu; l'oodua ike sede onwiya; ọ tọ dukwa ẹji mẹ onye obu nodu; ẹbe yeke nwanỳì obu akwadụ. Onye ono mekwaru ree. ³⁸Ọo ya bù l'onye luru nwanỳì meru ree. Onye aluduru iya nù kabakwaro eme ree.

Nwanỳì, ji iya anọhedu

³⁹Nwanỳì, aalù alulu bẹ ji iya nwekwa enwenwe mẹ ji iya -nodukwadu ndzụ. Mbọku, ọ nonyawaru ji iya nwuhu; e -shi mbọku ono bẹ ọ tọ dūhedu iphe, gude iya g'ọ to je aluru onye dù iya ree. Ọle g'ọ lukwaa onye kẹ Kéreshi. ⁴⁰Obenu l'ẹhu gege aka iya atso uto ọme ọ haru alù ji ozo. Nokwa gẹ mube Pọlu yeru onu bù ono. Mu nodu arikwaa lẹ Unme Chileke bukwa mu phọ l'ẹhu.

Eri iphe, a gwaru iphe

8 ¹Onu, mu yeru lẹ k'iphe, a gwaru iphe bù lẹ-a; l'a makwaru-a l'unu sùru l'anyi tukoru maru iphe. Ẹgube mmamiphe ono emejekwa

nemadzū g'o ku onwiya; obenu lẹ n-yemobu anọduje emetse emetse.

²Teke ọ bu l'ọ dūru onye arije lẹ ya maru iphe; onye ono teke amarwu-kwa iphe g'ọ gbaru iya l'amama iya. ³Obenu l'onye yeru Chileke obu bẹ Chileke maru.

⁴A bya lẹ k'eri iphe, a gwarū iphe mu sū; iphe, anyi makpoadaru bu l'ọ tọ dudu iphe, bu iphe, aagwa agwagwa mẹ ilile dūru iphe, ọ bu; mbū l'ọ bukota okorophoo iphe. Anyi makwaruphọ l'ọ tọ duedu Chileke ọzo, dū nū gbahaa Chileke lanū ono kpoloko. ⁵Kele ọ dūchakpooru nū igwerigwe iphe, eeku agwa, nọ l'imigwe ọzoo l'eliphe; g'iphe, e dobegbaaru abarū eja dūnaa igwerigwe; tẹme ndu ọphu ekuru nnajiuphu dūkwapho igwerigwe; ⁶obekwanu l'iphe, anyibedua makaharū bu lẹ Chileke dū nanū kpoloko kpẹekpu, bu iya bu Nna, onye iphemiphe shi l'ẹka; tẹme ọ buru iya bu onye anyi nọ-doru ndzū. Ọ bukwaruphọ Nnajiuphu lanū kpoloko dū, bu iya bu Jizosu Kéreshi; onye bu iya bẹ Chileke gbẹ l'ẹka iya mee iphemiphe; tẹme ọ bukwaru iya phọ bẹ anyi shi l'ẹka iya nọdu ọkpobe ndzū.

⁷Ọle unu maru l'ọ tọ budu onyemonye marwuru iya egube ono. Ndu ọphu egomunggo phẹ dū l'agwa ono mbukwadia ntanū-a; l'erikwadu iya l'ephe eri iphe, agwarū iphe. Iphe ono, ephe eri ono emerwushia phẹ egomunggo; kele ephe te ekweshiduru ike. ⁸Ọ tọ bukwa nri l'e-me g'anyi kabaa akpitaru Chileke ntse. ?Anyi riru iya-o; ?anyi te eriduru iya-o; anyi taa kakwa eji; ọphu anyi a-kakwa ree l'iphu Chileke.

⁹Ọo phọ g'unu kwabẹ ẹnya g'enweru onwonye unu ono ta aburu ọpfu dū ndu ọzo l'okpa, bu ndu ọphu ekweshiduru ike. ¹⁰Kele ọ -buru l'onye ekweta iya eshihuduru ike humaru gube onye ekweta ngu shihuru ike l'ẹka i nọ l'ulo agwa eri iphe, agwarū iphe; ?ti madu l'i gbẹ eyeru iya ọkpu-ikike g'o je asẹ ya onwiya asẹ wata eri iphe ono, a gwarū iphe ono? ¹¹Ọ n'iya bu onye ono, ọkpobe-ọpfu ono teke eshihuru ike l'okpoma ono eshi l'amarū iphe, i maru laaru onwiya l'iswi; mbū nwanna ngu ono, Kéreshi nwuhuru l'iswi ehu iya ono. ¹²Ọo ya bu lẹ teke unu meru egube ono bẹ unu mesewaru unwunna unu; ọpfu l'unu mekararū phẹ iphe l'obu phẹ ono, dūkwadu nyegenyege ono. Ọ kwa iya phọ bu l'unu shiwaal'ẹhu unwunna unu ono meswee Kéreshi l'iphe ono, unu meru ono. ¹³Noo g'ọ gude mu sū: o -shita g'iphe eri l'onu kpata gẹ nwanna mu mee iphe-eji; mu ebuchiapho ata anū lẹ phuruphuru gberegedege gẹ mu ta akporu iya okpa ye l'eme iphe-eji.

Iphe, rwuberu onye ishi-ozu

9 ¹Sū-a mbedua; ?mu ta abudu onye-ishi-ozu bya aburu onye nweru onwomu; bya egudekwapho ẹnya mu huma Jizosu Kéreshi, bu Nnajiuphu anyi? ?Tobudu unu bu iphe, egoshi ozi, mu nọ l'ẹka Nnajiuphu anyi ono jee? ²Mu 'abudu onye-ishi-ozu Jizosu l'ẹnnya ndu ọzo; mu aburu iya nū unubedua. Ọo unubedua bu iphe-ohubama, egoshi lẹ mu bu onye-ishi-ozu

Nnajiuphu; opfu l'unu byawaru bya aburu ndu ephe le Nnajiuphu tugbaru buru nanu.

³Wakwa onu, mu eyejeru ndu epfu l'iphe, mu eme ta abudu iya baa: ⁴Mu asuje phe: ?To rwubeduru mu g'aanuje mu nri waa iphe, aangungu k'ozu, mu eje? ⁵?To gbaduru mu eme ge ndu-ishi-ozu ozo; mbu eme g'unwune Nnajiuphu phe; me Pyita phe? Mbu l'o gbaru ge mu ga luta nwanyi, etso uzo ke Kereshi dujeru eje eka mu ejekpo. ⁶?Buepho mu le Banabasus kpoloko be l'e-seje akanya nri, anyi e-rije nodu ndzu to? ⁷?Bu onye ojogu gunu jejeru ugu apfu onwiya uguwo? ?Bu onye kojeru opfu vayinu; o haa eri akpuru, shi iya nu? ?Bu onye dobejeru aturu ophu o ridu iphe, shi iya nu?

⁸?O du unu ge mu epfu iphe-a kele oo iphe, ndiphe epfuje? ?To ta atukwaru iya pho lekemu? ⁹Noo kele e deru iya lekwo ekemu, Chileke turu nu Mosisu su: "Unu te ekechijekwa eswi onu me unu mee ya o nodu azoshiru unu eswa l'ereshi." ?O du unu go bu eswi be Chileke ayoshi iya ono? ¹⁰O bukpokwaa opfu ehuni anyi be oopfu ono. Oo anyi be e dedoru iya. Kele onye ako opfu anoduje ako iya ele enya iphe, o-meta leka ono. Onye echishi eswa l'iphe, o koru anodujekwapho echishi iya togbo enya l'iphe, o-metakwa iya pho. ¹¹Anyi kuwaru iphe-oma, shi leka Unme Chileke lechilabo unu gaakuje akpuru-iphe legu-a. ?O bu iphe, paru eka me anyi -shi unu leka kpataje iphe, eele lenya rije nodu ndzu? ¹²Eshinu ophu unu agbeje kwe lo rwuberu ndu ozo gephe rita iphe leka unu; ?to kachidaa anyi erwube g'anyi rita?

O duchakpoo nno; ole mu teke atu-swee ya ama ememe. O chia iphe, mu emejehia bu nshi be mu atagbuje iphemiphe geeshi ge mu ta agbe egbuchi uzo ozi-oma ke Kereshi. ¹³?Unu ta amadu le ndu eje ozi leze-ulo Chileke bu nri shi leze-ulo Chileke be ephe erije? Ndu eje ozi loru-ngweja Chileke nodu eketajekwapho iphe, e gude gwaa Chileke. ¹⁴Nokwapho ge Nnajiuphu turu ekemu su ge ndu ezi ozi-oma rije iphe, shi lozi-oma, ephe ezi.

¹⁵Obenu le mu teke aji-swee unu aji iphe, du egube ono. Ophu o bukwa lekwo-ozu-a, mu ederu unu-a bu le mu suru l'iphe ono rwuberu mu nta. Mbua; o kachikwa mu ree le mu nwuhuru; eme lo nweru onye meru g'aba ono, mu abaa ono, buru mkpokoro opfu. ¹⁶Unu maru l'iphe, mu anoduje aba l'abaa ta bukwa le mu ezi ozi-oma ono. Ezi ozi-oma bukwa iphe, mu mefutaje. Nshio mu me mu eziduru ozi-oma ono! ¹⁷O -buru le mu turu obu mu onyo ezi ozi-oma ono; be obunggo iya rwubekwaru mu. Obenu le mu eje iya kele o buwaa ozi, e yeru mu leka. ¹⁸?Bu gunu bu mu obunggo iya nta? Iphe, bu mu obunggo iya bu le mu anoduje ezi ozi-oma ono; mu ta anadadu aswa iya, bu iya bu iphe, gbaru mu lememe lozi ono, mu ezi ono.

¹⁹A makwaru-a l'o to dudu nemadzu, aturu mu iphe, mu e-me; ole mu gudewaa eka mu mee onwomu ohu onyemonye; geeshi ge mu gude

ozì-òma ono kabaa epfubuta igwerigwe nemadzù. ²⁰Mu lẹ ndu Jiu nõdu; mu emeahaa umere ndu Jiu; g'eeshi gẹ mu pfubuta ndu Jiu. Mu lẹ ndu gude ekemu buru nõdu; mu emeahaa g'onye gude ekemu buru; k'òphu mu e-pfubuta ndu gude ekemu buru. ²¹Mu lẹ ndu ete pfudu k'ekemu nõdu; mu ahaẹkwapho k'ekemu; egudekpòoro l'a ta haduru mu gẹ mu b'e mee iphe, ekemu Chileke pfuru; obenu lẹ mu gude ekemu Kéreshi buru; g'eeshi gẹ mu pfubuta ndu ete epfudu k'ekemu. ²²Mu lẹ ndu ekweta phẹ dù nyẹgenyege nõdu; mu aburu onye ekweta iya dù nyẹgenyege g'eeshi gẹ mu epfubuta phẹ. Ọo ya bụ l'iphe, bụkpoo iphe, onyemonye bụ; mu abụekwarupho iphe ono gẹ mu eshi nno dù ike pfuta ndiphe yeru Kéreshi g'ò dzọ phẹ.

²³Iphe, mu gude emekotakpoo iphe ono bụ lẹ mu ese iswi ozì-òma ono; g'eeshi gẹ mu ayiru l'iphe-òma, dù iya nù. ²⁴?Unu ta amahaadaa l'a -nõdu agba ọso bẹ a tukoje agba iya; ọle ọo onye lanu kpeekpu emechajẹ nata obunggo ọso ọbu? Ọo ya bụ; g'unu kukebe ẹhu gba ọso ono g'unu aburu ndu a-nata obunggo iya. ²⁵Onyemonye, bụkpoo onye akwakọ atụ ẹgo ọso lekukebeje ẹhu esede onwiya l'iphemiphe, oome. Iphe, oosedede onwiya ono bụ g'ò nata obunggo, dù l'oso ono; mbu obunggo ta adudu g'ò nõ-beru l'o mebyishihu. Obenu l'anyiibe ndu etso Kéreshi esedeje onwanyi g'anyi anata obunggo ọphu a-nọwaro jasù lẹ tuutuutu lẹ miiimii. ²⁶Noo iphe, meru g'ò gude mu nõdu agba gẹ mu gbarwua ẹka a kparu mu oke gẹ mu gbarwua. Ọ bụkwarupho iphe ono meru g'ò gude ọphu mu etsudu ẹka g'onye etsu pherephere ẹka. ²⁷Ọ chia iphe, mu emeje bụ lẹ mu etsuje onwomu iphe; tsushia ya ike k'òphu mu e-sede onwomu ọkpobe esede; g'ò tọ buru mu -pfutachaa ndu ọzo yeru Kéreshi; e -mechaa mu agbẹ buru onye ọphu Chileke a-jika ajika.

Anma ọkwa

10 ¹Sù-a; unwunna mu; unu nyatajẹkwa g'ò nwuru nna anyi oche phẹ. Lẹ g'ẹphe hakotakpoo bẹ nõkotaru lẹ mkpula urwukpu ono. G'ẹphe ha jekota ije l'alì ọkponku ono gude ghaa eze mini ono. ²G'ẹphe ha bẹ Chileke gude urwukpu ono waa eze-enyimu ono mee baputizimu g'ẹphe buru ndu etso Mosisu. ³G'ẹphe ha rikotaru udu nri lanu ono, shi l'imigwe ono ⁴bya angukotakwapho mini ono, shi l'ẹka Unme Chileke ono. Kele ẹphe nguru mini, shi lẹ mkpuma ono, a ta humajedu l'anya ono. Mkpuma ono bụ iya bụ Kéreshi. Ọ buru mkpuma ono bẹ tsoru phẹ nù ono. ⁵Ọo l'ọobu; ndu ọphu mecharu mee iphe, ejiduru Chileke ẹpho mechakwaaru ka shii. Ndu k'ono bẹ ishi phẹ tuphashihururo teke ẹphe nõro l'echiegu.

⁶Sù-a; iphemiphe ono tukokwaru buru iphe, alọ anyi ẹka lẹ nchị g'anyi gude kwaa ẹnya; g'ẹgu eme ejo-iphe ta agujeshi anyi g'ò guru ndu ono. ⁷Unu ta agwajẹkwa iphe; l'ọ kwa g'ẹphe haru mee teke ndiche ono, bụ

iya bụ iphe, e deru l'ekwo-opfu Chileke sụ: “Ndu Ízurelu dọru eri nri; bya angụ mee; emechaa ephe wulihu meahaa emereme.” ⁸G'anyi te ejekwa eme ke nwanyị ozoo ke nwoke g'ephe hakwarupho mee; e mechaa unu unu nemadzu ukporo labo l'iri l'esa l'umadzu ukporo iri nwushihukota l'akpuru enyanwu lanu. ⁹Ophu anyi ahukwa Nnajiuphu ama, bu iya bu g'ephe haru hua ya teke ndiche ono; agwo tagbushia phe. ¹⁰Ophu unu agujekwa aphu; g'ephe hakwarupho gua ono; ojozi-imigwe bu O-gbu-nemadzu, shi l'eka Chileke bya eworu phe gbushia.

¹¹Su-a; iphemiphe-a mekotaru l'ehu phe go buru iphe, e gude anmaru anyi okwa; teme e deshia ya l'ekwo go buru iphe, e gude ezi anyi iphe; mbu anyibe ogbo owa-a, buwaa teke iphemiphe e-meebekota-a.

¹²Oo ya bu; g'onye riru le ya pfushiru ike pfukwaru kwabe enya; a -nonyaa o daa! ¹³L'o to dukwa ohtama, byapfutajewaru unu, 'abudu egube ohtama, abyapfutajekwapho ndu ozo. Obenu le Chileke bu onye emeje iphe, o suru l'oo-me. O to kwe du g'a hua unu ama hughata iya g'ike unu ha; o chia le teke aahu unu ama ono be oo-goshikwapho unu uzo, unu e-shi nahu ohtama ono. Oo ya bu g'unu adu ike tagbua ya le nshi.

¹⁴Noo ya bu le-a; ndu mu yeru obu; unu nahu egwe aja. ¹⁵O kwa opfu, eepfujeru onye nweru egomunggo be mu epfuru unu-a. Unu leanaro enya l'iphe ono, mu epfu ono. ¹⁶Okoro onu-oma ono, anyi tukoru ago anyata nri Nnajiuphu ono, bukwaphe iphe, anyi ekele Chileke ekele iya ono; ?to budu mee Kereshi be anyi gba mba l'okoro ono? To; buredi ono, anyi awashije ata ono; ?to budu eh Kereshi be anyi tukokwarupho gbaru mba ono? ¹⁷Eshinu o bu buredi lanu du be anyi tukokwaru buru eh lanu; obeta o buru l'anyi du igwerigwe; eshinu anyi tukoru erigba buredi lanu ono.

¹⁸Unu leanaro iphe, ndu Ízurelu emeje. Iphe, bu ndu taru anu ono, e gude bya egweeru Chileke ngweja l'oru-ngweja ono; ?ephe ta abuada ndu eje ozi l'oru-ngweja obu? ¹⁹?Bukwanu gunu be mu eme ge mu pfua? ?Bu l'o duru iphe, obu mbu iphe, aagwa agwagwa; ozoo iphe, a tushiru l'iphe too? ²⁰Waawakwa! Iphe, mu epfu bukwa le ngweja, ndu ta abudu ndu Ízurelu egweje bu obvu be ephe egweru iya. O to budu Chileke. Ophu mu ekwekwanu g'unu l'obvu tugba buru nanu. ²¹Unu ta abyakwa l'a-nodu angu iphe, shi l'okoro ke Nnajiuphu bya angukwapho ophu shi l'okoro k'obvu. Nokwapho g'unu ta abyadu l'a-nodu eri nri le teburu ke Nnajiuphu bya erikwapho le teburu k'obvu. ²²?Anyi agbe kpata Nnajiuphu eko okophoo? ?O du unu g'anyi ka Chileke ike?

Eme iphe m'obvu nwune ngu

²³Iphemiphe be a hakwaru uzo g'e meje; ole o to bukwanu iphemiphe bu e -mee ya l'o duru onye meru iya nu le ree. A hakwaru uzo g'e meje iphemiphe; obenu l'o to budu iphemiphe l'emetseje onye eme iya nu

emetse. ²⁴G'ò tọ dukwa onye anọdu achọ iphe, a-duru iya lẹ ree. G'onye-nonu chojechia iphe, a-duru ndu ọzo lẹ ree.

²⁵Iphe, bukpuo anu, i zuru l'aswa; tajee ya pho; te ejekwa akpa ishi aka o shi; g'obu etee jedu ngu anma ikpe. ²⁶“Lẹ mgboko l'ophu; mę iphe dukota iya nu; bukotakwa ke Nnajiuphu, bu Chileke.”

²⁷Teke onye te ekwedu ke Kereshi ziru ngu lẹ nri; i kweta l'ii-je; rie-kwapu iphemiphe, e doberu ngu g'i ria. B'ajikwa aji; m'obvu obu anma ikpe. ²⁸Obenu o -buru l'o duru onye tufuru onu su ngu: “Iphe-a bukwa iphe, a gwaru iphe”; te erikwa iphe obu; m'obvu onye ono, pfuru ngu iphe onoya; mekwapho m'obvu obu anma ikpe. “Kele eliphe l'ophu mekpoo iphemiphe, nokota iya nu bukotakwa ke Nnajiuphu.” ²⁹Obu anma ikpe mu epfuru ta abukwa nkengu; o kwa k'onye ono. Kele-a; ?bu obu anma ikpe k'onye ozo; l'e-me ge mu ta atusaru eh? ³⁰Eshinu mu ekeleje Chileke ekele me mu -bya eri nri; ?denuhunu g'o gude o buru iphe ono, mu keleru Chileke ekele teme mu riye iya ono be aa-gbe pfubuyishi mu.

³¹Oo ya bu; m'obeta unu ria nri-o; ozoo l'unu nguru iphe, aangu angungu-o; ozoo iphe, bukpuo iphe, unu meru; unu meje iya g'o buru iphe, unu gude aja Chileke ajaja. ³²G'ò tọ dukwa onye aburu upfu du onye ozo l'okpa; m'o bu onye Jiu; m'o bu onye abudu onye Jiu; m'o bu Chiochi ke Chileke. ³³Oo pho ge mu emeje bu g'unu e-meje; mbu ge mu anoduje eme ge mu mee iphemiphe g'o du onyemonye ree. Mu ta achojedu iphe, a-duru mu lẹ ree; gbahaa iphe, a-duru ikpoto ndu ọzo lẹ ree g'eeshi g'a dzoo phe.

11 ¹Oo ya bu; g'unu tsoje aka mu ge mu etso aka Kereshi.

Ekpuchi iphe l'ishi abaru Chileke aja

²Mu ajakpuo unu ajaja unwanu mu; l'unu anyataje mu tekenteke; teme unu gudeshia iphe ono, Chiochi ezije ono; g'e yeru mu iya l'eka mu bya ezia ya unu. ³Ole iphe, mu eme g'unu makwarupho bu l'oo Kereshi bu ishi iphe, bukpuo onye nwoke; nwoke bukwanuru ishi ke nwanyi, oolu alulu. O bukwanuru Chileke bu ishi ke Kereshi. ⁴Nwoke, epfu anu Chileke; ozoo loopfuchiru Chileke; bya ekpuru okpulishi; bukwa ishi iya be o too kwabedu ubvu. ⁵O bekwanu lẹ nwanyi, epfu anu Chileke; ozoo loopfuchiru Chileke; ophu o kechiduru iphe l'ishi; bukwa ishi iya be o too kwabedu ubvu; kele ono duwaa g'o kpushiru ishi akpushi. ⁶Lẹ teke o bu lẹ nwanyi tee kebedu iphe l'ishi; ge nwanyi obu kpashienupho egbushi iya akpashi. Ole eshinu o bu iphe-iphere ke ge nwanyi kpashia egbushi; ozoo g'o kpushia ya akpushi; o n'ia bu ge nwanyi kebeje iphe l'egbushi. ⁷Nwoke ta agbaduru g'o kpuru okpulishi eshinu Chileke meru iya o yee ya teme o buru iya egoshi ge Chileke du-be biribiri; obenu lẹ nwanyi ego-shi ge nwoke du-be biribiri. ⁸Noo l'o tọ bukwa nwoke be e gude iphe, shi l'ehu nwanyi mee; o kwa nwanyi be e gude iphe, shi l'ehu nwoke mee. ⁹Ophu o budu nwoke be o meru g'o buru ke nwanyi; o chia nwanyi be o

meru g'ò buru kẹ nwoke. ¹⁰Noo g'ò gude nwanyị je l'ekebeje nkelishi gude goshi l'òo ji iya nwe iya; wakwaphọ m'òbvu ụnwu-ojozi-imigwe. ¹¹G'ò dụnhabekpoo; ọ tọ dukwa iphe, nwanyị bụ mẹ e -wofu nwoke; ọphu ọ dukwa iphe, nwoke bụ mẹ e -wofu nwanyị l'atugba-a, anyi lẹ Kéreshi tugbaru-a. ¹²Ọ kwa iphe, shi l'ẹhu nwoke bẹ Chileke gude mee nwanyị; ọ bụkwanuru nwanyị bẹ anwuje nwoke. Ọle ẹphenebo shikọta Chileke, bụ iya meru iphemiphe l'ẹka.

¹³Unu lewa iya rọ ọnya l'onwunu. ?Ọ gbaru kẹ gẹ nwanyị ghebeje ishi ọnu l'ẹka oopfụ anụ Chileke tọo? ¹⁴?Unu ta amadụ lẹ gẹ nemadzụ gbakpọoru ụgbugba bẹ nwoke eme onwiya iphe-iphere mẹ ọ -buru l'ọ haru ẹgbushi iya; ọ lọshia ogologo? ¹⁵Obenu lẹ teke nwanyị nweru ẹgbushi ogologo bẹ ọ bụchaa ya adụ ụbvù. Ẹgbushi ogologo bẹ Chileke nuru nwanyị g'ò buru iphe, e-kpuchije iya ishi. ¹⁶Ọ -duru onye atụ ẹgo l'ọ tọ dudu ẹgube ono; anyi te nweekwa omelalị ọzo; ọphu Chiochi kẹ Chileke enwekwapo.

Eri nri-enyashi Nnajiuphu

¹⁷A bya l'iphe ọwa-a, mu abya epfupfu-a; bẹ mu ta ajakwa unu ajaja iya l'edzuko, unubẹ Chiochi edzukoje agbejekwanu buru; o -shita ọphu ooye ẹka l'ogbe egbuchi ndu ọzo ụzo. ¹⁸Kẹ mbụ iya kpọada; bụ lẹ mu nūmaru l'unu anọduje akparu onwunu oke mẹ unu -dzukọbe; mbụ l'ọ dukwa mu g'iphe ono a-haru buru eviya. ¹⁹Mu maru l'ọ bụ eviya l'ọ tọ dudu g'eemehabẹ g'unu ta anọdu ẹkpa l'iche iche. Ọo ya bụkwanu g'aa-majeru ndu ọphu eme iphe, dūbe ree l'iphu Chileke. ²⁰G'unu edzukọbeje ono; ta abụkwa nri-enyashi Nnajiuphu bẹ unu edzukọbeje g'unu ria; ²¹eshinu ọobujeru; unu gbeshi onyenonu apata nri nkiya eri angụ l'ẹbe akwaberu onye ọzo. E -mechaa; ẹgu agụ ndu ọo-nọdu agụ; mẹe atsụ ndu ọphu ọo-nọdu atsụ. ²²Ha! ?Ọ dụn g'unu te enweedu ụlo, unu a-nọduje l'ibe unu eri angụ ọbu? Tọo; ?ọ bụkpoepo Chiochi kẹ Chileke bẹ unu akpọ ẹbo l'afụ; bya eme ndu adudu g'ò dụn phẹ iphe-iphere? ?Denukpoo iphe, mu e-pfuru nū unu? ?Mu a-nọdu etu unu ẹpha iya tọ? Mu tee tukwa unu ẹpha iya!

²³Liphe ono, mu ziru unu ono bụkwa Nnajiuphu l'onwiya pfuru mu iya; lẹ yẹbedua, bụ Jizosu wotaru buredi l'enyashi mbọku ono, e deru iya ye ono; ²⁴bya ekelechaa Chileke ekele iya bya eworu iya nyawashia bya asụ: “Nggẹ ta! Ọwa-a bụ ogwehu mu, e gude gwee ẹja ẹhu unu. Unu meje iphe-a gude nyatajẹ mu.” ²⁵Nokwaphọ g'ò wotaru okoro ono g'e richaaruru nri-enyashi ono bya asụ: “Okoro-a egoshi ọgbandzu ọphúú, e gude mee mu gbaa. Teke bụkpoo teke unu nguru iya; unu gudeje iya nyata mu.” ²⁶Kele teke unu ata buredi-a; bya angụ iphe, shi l'okoro-a; bẹ unu epfuka-shiakwaa k'anwuhu Nnajiuphu ono; jasụ l'ọ bya.

²⁷Sụ-a; onye bụkwanu onye riru buredi ono; ọzoo l'ọ nguru iphe, angungu l'okoro kẹ Nnajiuphu ono l'uzo apfuduru-oto; onye ono bẹ ikpe

ogwèhu yè mee Nnajiuphu ono nmakwaru. ²⁸Ọo ya bụ gè nemadzu nyochajèadaa onwiya ime tème l'o ria buredi ono ngua iphe, shi l'okoro ono. ²⁹L'onye eri angu; èbe ọ makahadu iphe, ogwèhu Kéreshi bụ; l'eritakwa bya angutakwapho ikpe eye onwiya l'èhu. ³⁰Ọ kwa iphe ono meru g'o gude igwe ọha l'ime unu dū nyègenyege; ndu azèe l'iphe-ememe; ndu ọnwu egbushia. ³¹Obenu lè teke anyi vuwaa ọzo kpee onwanyi ọkpobe ikpe; ọ n'iya bụ l'e tee kpeedu anyi ikpe. ³²Ọle teke ọ bukwanu lè Nnajiuphu kperu anyi ikpe; kpechaa bya ahua anyi ahuhù; iphe, oome iya buana g'oo too jehedu achigbabe anyi lè ndiphe tuko nmaa ikpe.

³³Ọo ya bụ; unwunna mu; unu -nodu edzuko k'eri nri Nnajiuphu ono; unu nodujekwa kwaberu nwibe unu. ³⁴Teke ọ bụ l'ọ duru onye egu agu; g'onye ono vuru ọzo riadaa nri l'unuphu; ọ nonyakwaa Chileke nmaa unu ikpe k'edzuko, unu edzukoje. Noo gè k'ono dū bụ ono. A bya l'iphemiphe ndu ophu; ono buwaro mu -bya; mu eyefua ya onu.

Iphe-oma, shigba l'eka Unme-dū-Nso

12 ¹A bya lè k'iphe-oma, shigba l'eka Unme-dū-Nso; unwunna mu; gè mu mekwaa ya g'o doo unu enya ree. ²Unu maanaru-a lè teke unu eshidu buru kè Kéreshi bè bụ unwu-obvu-a, ete pfudu opfu-a shi alo unu kpurukpuru. Ọ buru iya shi anoduje egoshi unu ọzo unu a-nodu eshi. ³Noo g'o shitaru mu nodu eme g'o doo unu enya l'ọ to dukwa onye gude Unme Chileke epfu opfu abya asu: “Gè Jizosu vukwaru onu.” Ophu ọ dukwapho onye adu ike epfufuta su lè Jizosu bụ Nnajiuphu gbahaa l'o gude Unme-dū-Nso epfu iya.

⁴Iphe-oma, shi l'eka Unme-dū-Nso dū iche iche; ọle ọ kwa Unme lanu kpoloko bụ Unme, anukota iya nu. ⁵Nokwapho g'uzo, e shi ejeru Nnajiuphu ozi dukwapho iche iche; ọ bukwarupho Nnajiuphu lanu ono bè a tukoru ejeru ozi obu. ⁶Ike, Chileke eyeje nemadzu l'èhu g'o gude meje iphe, dukwa iche iche. Ọle ọ kwaa Chileke lanu emekotaje ike ono g'o ree ire l'èhu onyemonye, o yeru iya l'èhu. ⁷Chileke gbè l'eka onyemonye l'èhu l'èhu egoshi g'ike Unme-dū-Nso erebe ire g'ọ buru iphe, a-baru onyemonye urwu. ⁸Mbua; onye lanu bè Unme-dū-Nso ono eyeje ike l'èhu k'ophu oopfuje opfu mmamiphe; l'o ye onye ozo ike l'èhu k'ophu oopfuje opfu, egoshije l'ọ maru Chileke ọkpobe amama. Ọ bukwaru-a Unme-dū-Nso lanu ono. ⁹Ọ -gbeshi l'obya eye onye ozo ike l'èhu; ike k'ekweta kè Chileke gudeje iya eme iphe, dugbaa biribiri; l'oo bukpoekwarupho Unme-dū-Nso lanu ono. Onye ophu ooye ike l'èhu k'emeje g'onye iphe, eme wekorohu; ọ bukwaru-a Unme lanu ono kpoekwapho. ¹⁰Onye ozo bè ooyeje ike l'èhu k'eme iphe-ohumalenya; l'ooye onye ozo ike l'èhu k'epfuchiru Chileke; l'ooye onye ozo ike l'èhu k'akokahaje iphe, shi l'eka Unme-dū-Nso l'ophu eshidu iya nu; l'ooye onye ozo ike l'èhu k'epfuje l'olu Unme-dū-Nso; l'ooye onye ozo ike l'èhu k'akoje iphe, eepfu l'olu Unme-dū-Nso ono. ¹¹Ọle ọ

tùkòkwaru buru Unme-dù-Nsò lanù atùkòtaje iphemiphe ono eme. Oomejeru onyemonye iphe-òma, dù iche iche g'ò tìru obu iya onyo l'oome iya.

Ogwehu lanù yele iphemiphe, p'fùkashiru iya nù

¹²Lè Chìochi kẹ Kéreshi òkwa g'ogwehu lanù. Ogwehu nemadzù enwejekwaru mp'fùkashi, dù igwerigwe. A makwaru-a lẹ mp'fùkashi iya dù igwerigwe; òlẹ ọ b'uenupho ogwehu lanù g'ò b'ù iya. ¹³Kẹlẹ iphe, b'ùkpoo g'anyi ha; ?ì b'ù onye Jiu-o; ?ì b'ù onye Gurisu-o; ?ì b'ù ohu-o; ?ì b'ù amadu-o; Unme-dù-Nsò t'ùkòakwaru anyi jigba; anyi buru ogwehu lanù teke anyi meru baputizimu; anyi t'ùkò gbawaru mgba lẹ Unme-dù-Nsò ono, b'ù iya bẹ eyeje anyi ike l'èhu ono.

¹⁴L'ogwehu l'onwiya ta akp'ùkòkwaru ophu. Iphe, dù iya nù òkwa igwerigwe. ¹⁵Ọ -b'ù l'ọ kẹ g'òkpa s'ù l'eshinu ya ab'udu ẹka bẹ ya ab'ukwa iphe, dù l'èhu; ?b'ù iphe ono a-k'òshì iya ab'uru iphe, dù l'ogwehu? ¹⁶Ọzoo l'ọ nchì s'uru l'eshinu ya ab'udu ẹnya bẹ ya ab'ukwa ẹhu nemadzù; ono taa k'òshikwa iya ab'uru iphe, t'epfuru l'èhu. ¹⁷Ọme ẹhu l'ophu t'ùkòru b'uru ẹnya lanù; ?b'ù g'unu bẹ e gege egudeje anù iphe? Mb'ua ọme ogwehu l'ophu t'ùkòru buru nchì lanù; ?b'ù awe bẹ e gege egudeje anù ishishi iphe? ¹⁸Obenu lẹ g'ò dù nta-a b'ù lẹ Chileke meru ẹhu nemadzù bya emobechaa ya mp'fùkashi iya g'ò t'uberu. ¹⁹Ọme iphemiphe ono t'ùkòru kp'ukoo ophu; ?b'ù awe gege ab'uru ogwehu? ²⁰Obe lẹ g'ò dù nta-a b'ù l'ọ nweru mp'fùkashi igwerigwe; òlẹ ọ t'ùkòkwaru-a buru ogwehu lanù.

²¹Ọ t'ò dùdu teke ẹnya a-gbẹ gb'eshi l'ọ s'ù ẹka l'ọ t'ò dùdu iya mkpa. Ophu ọ òk'wapho teke ishi a-gb'eshi l'ọosu ọkpa l'ọ t'ò dùdu iya mkpa. ²²Ọ chia iphe, meru nù b'ù lẹ mp'fùkata ẹhu anyi ibiya ono, g'baru g'ò b'ù iya bẹ ẹnya kachaa alwalwa ono bẹ gbẹ y'ihukwaru-a l'iphe, aba lẹ mkpa. ²³Tẹme mp'fùkata ẹhu anyi ibiya ono, anyi r'iru l'ọ t'ò kwataduru g'baa k'akwabẹ ùb'vù ono bẹ anyi akwajẹ akwa gude kwabẹ iya ùb'vù, p'furu iche. Ibiya ono, anyi edomi edomi ono bẹ anyi gbẹ akajẹnu eleta ẹnya; ²⁴mb'ù eleta ẹnya, mkpa iya ad'uduru ibiya ọzo. Ọlẹ Chileke wol'eru-a ẹhu nemadzù dzepfua nanù; bya eworu ùb'vù, ka shii kwabẹ mp'fùkata ẹhu anyi ibiya ono, aakwabẹ-ziduru ùb'vù ono. ²⁵Noo ya b'ù; gẹ mp'fùkata ẹhu yẹ nwibe iya ata adz'oduru onwophẹ ẹnya; gb'ahaa g'ẹphe t'ùkòje leta nwibe phẹ ẹnya. ²⁶Teke iphe eme nanù ẹhuka; oomedzukwaruphọ ẹhu l'ophu. Teke a kwab'uru nanù ùb'vù; ẹhu l'ophu etedzuru ẹs'wa iya.

²⁷S'ù-a; ọ kwa unu b'ù ogwehu Kéreshi; onyemonye l'èhu l'èhu buru mp'fùkata iya. ²⁸Chileke bya at'ua nemadzù ẹka iche iche lẹ Chìochi shi nno goshi onyemonye iphe, ọo-n'odu eme. O vuru ọzo bya edobe ndu-ishi-ozì; bya edotsota iya ndu epfuchiru iya nù. Ọ bya lẹ k'ẹto bya edobe ndu ezi iphe; bya edobe ndu emeje iphe-òhumalenya; waa ndu emeje ndu iphe eme g'ẹphe wek'orohu; waa ndu an'oduje eye ẹka; waa ndu mkp'ozì-ọzo; mẹ ndu epfujẹ l'olu Unme-dù-Nsò. ²⁹?B'ù onyemonye b'ù-dzuru

ndu-ishi-ozī? ?Bū onyemonye bū onye epfuchiru Chileke? ?Bū onyemonye bū onye ezije iphe? Tōo ?bū g'ēphe ha nwendzuru ike eme iphe-ōhumale-nya? ³⁰?Bū g'ēphe ha bē Chileke yedzuru ike l'ēhu k'eme g'onye iphe eme wekōrohu? ?Bū ōha epfudzuru l'olu Unme-dū-Nsō? Tōo ?bū ōha adūje ike kōo iphe, eepfu l'olu, Unme-dū-Nsō? ³¹Sū-a; g'onyenōnu yejeru ēhu lē gē ya e-shi meje iphe ono ndu ōphu ka mkpa; ōle mu e-goshiadaa unu ūzo ōphu bū iya kwatarū kabakpōoro mkpa.

N-yemobu

13 ¹Sū-a; ō tō dukwa mē mu aghajē opfu-alī mu egudeje iphe, bukpoō opfu unwu-eliphe; ōzoo opfu unwu-ojozi-imigwe epfu; n-yemobu rwūhu mu l'ēhu bē mu bukwaā njaja ogena; ōzoo eze ōkunmengu, aha igbangu igbangu. ²Mbū-a; ō tō dukwa mē Unme-dū-Nsō yechaaru mu ike l'ēhu gē mu pfuchijeru Chileke; mu bya amacharu Chileke ōkpobe amaru; makōtaru iphemiphe, o shi domia edomi; bya akachakpōo ekweta kē Chileke ono kweshia ike; k'ōphu bū mu -sū úbvú g'ō phōfu l'ēka ō nō; l'ō phōfu; ōphu mu enwedu n-yemobu bē ō tō dukwa iphe, mu bū. ³Ō tō dukwa mē mu tūkoru iphe, mu nweru enweru mekōta iphe-ōma; bya ekwechaa g'e woru mu kpōo ōku; ēbe mu enwedu n-yemobu; ō tō dukwa urwu, mu ritaru iya.

⁴N-yemobu atajeru iphe nshi; bya eme odoo. O to jidu iji-ēnya. Ebe ookudu onwiya; ōphu o tudu onwiya ō-phushia-ugbu. ⁵O to kwejedu gē nemadzū mee iphe, adūdu ree; ōphu ookwejedu gē nemadzū būru o-pfu-nkiya-anū-nkiya; ōphu ēhu eghujedu iya eghu ēgwegwa; ēbe ō madū k'edo iphe l'ōkpoma. ⁶O to tejedu ēswa ekpu iphe, apfūduru nhamūnha. Ō chia iphe, bū ire-lanū bē o teje ēswa ekpu. ⁷Ōotajeru iphemiphe nshi; ō nōdu ekwetajē iphemiphe; ele ēnya k'ōma l'iphemiphe; bya apfū-shijē ike l'iphemiphe.

⁸N-yemobu a-dukwa gbururu jeadūru adūru. Ike k'epfuchiru Chileke e-mechakwaa bvū; ike k'epfu l'olu Unme-dū-Nsō abvū. Ō bukwarupho ēgube ono bē k'amaru Chileke ōkpobe amama l'a-bvū nkiya. ⁹Kēle anyi maru mapete; anyi nōdu epfuchiru Chileke epfupete iya. ¹⁰Obenu lē teke Chileke e-goshigbu anyi g'iphemiphe gbaru; bē iphe, bukpoō iphe, edzuduru oke ephushihu.

¹¹Sū-a; teke mu shi būru nwata bē mu shi epfujē g'unwegirima; mu shi nweru egomunggo unwegirima; shi arije ōriri g'unwegirima. Mu buerupho onye bū ōgerenya; mu tūko ēhu nwata gwōbe. ¹²Lē nta-a bē anyi gudekwa onyo aphū iphemiphe ono inyoki inyoki. O -rwua teke ono bē anyi lē Kēreshi a-hūmagbabe onwanyi l'iphu l'iphu. Nta-a bē mu maru iphemiphe ēka lanū ēka lanū; o -rwua teke ono bē mu a-makōtaru iphemiphe ōkpobe amaru; gē Chileke makōtaru mbēdua nta-a.

¹³Ōo ya bū l'ōo ūzo iphe ēto a-phōdu, bū iya bū ekweta; waa iphe, eele ēnya iya; waa n-yemobu; ēphe n'ēto tūkoru būru iphe, ta ayīdu bvū abvū-bvū; ōle ōphu kachaa shii bū n-yemobu.

Iphe-oma kẹ mpfuchiru waa k'epfu l'olu Unme-dụ-Nso

14 ¹Unu seje g'unu yee nwibe unu obu. G'iphe-oma, shigbaa l'ẹka Unme-dụ-Nso gụ-shijekwa unu ike; kelekele k'iphe-oma k'epfuchiru Chileke. ²L'onye epfu l'olu Unme-dụ-Nso ta abụkwa nemadụ bẹ oopfụ anụ; ọ kwa Chileke bẹ oopfụ anụ. O gude Unme Chileke epfu iphe, Chileke shi domia edomi. ³Obenu l'onye epfuchiru Chileke bẹ bụ nemadụ bẹ oopfụ eyeru. O shi ẹgube ono emetse onyemonye emetse; eyeru pẹ ọku g'obu shihu pẹ ike bya adụkwa pẹ phọ obu. ⁴Onye epfu opfu l'olu Unme-dụ-Nso bụkwa onwiya bẹ oometse; obenu l'onye epfuchiru Chileke bẹ bụ Chiochi bẹ oometse.

⁵Iphe, gege adụ mu ree bụ g'iphe, bụkpoo g'unu ha pfuje l'olu Unme-dụ-Nso; ọle o gege akabaa mu rọ ree g'a sụ l'unu epfuchiru Chileke. Kẹle onye epfuchiru Chileke kakwa onye epfu l'olu Unme-dụ-Nso; gbahakwaa l'o nweru onye duru ike kọo iphe ono, oopfụ ono. Oo ya bụkwanu g'opfu ọbu a-buru iphe, a-nodu emetse Chiochi emetse. ⁶Mbụa; unwanu mu; mu -byapfuta unu bya egude olu Unme-dụ-Nso epfu eyeru unu; ?denu urwu, unu e-rita iya? Gbahaa lẹ mu byaru bya egoshiahaa unu iphe ọphúú; ọzoo lẹ mu byaru bya eziahaa unu k'amaru Chileke ọkpobe ama; ọzoo lẹ mu byaru bya epfuchiaharu Chileke; ọzoo lẹ mu byaru bya awata unu ezi iphe.

⁷Mbụkpoo iphe, dụ g'opu ọzoo ogumogu, bụgbaa iphe, adzudu ndzụ; a ta amajekwaru iphe, oopfụ gbahaa l'odafuta ọda ree. ⁸Teme teke ọ bụ l'onye egbu opu-ogu te egbuduru iya g'eegbuje iya g'a maru l'ogu abya; ?bụ onye abya akwakobe k'eje ọgu? ⁹Oo ya bụ l'o nokwapho g'ọ dụ l'ẹhu unu bụ ono. Teke ọ bụ l'unu epfu l'olu Unme-dụ-Nso; unu nodu epfu opfu, a madu iphe, ọ bụ; ?denu g'ee-shihunu maru iphe, unu eepfu? Unu ta amadu l'opfu, unu epfu bụ pherephere bẹ unu epfu iya anụ. ¹⁰A ta atukwa iya ego l'opfu-alị ndu dūgbaa iche iche, dū lẹ mgboko-a bẹ a ta agutadu aguta; obenu l'o to nwedu mē nanu te edojedu ndu epfu iya nū ẹnya. ¹¹Oo ya bụ lẹ teke ọ bụ lẹ mu ta anudu opfu-alị ọbu; mu aburu ọhantsu l'ẹnya onye epfu iya nū; onye epfu iya nū a bụkwanuru mbedua onye ọhantsu. ¹²Nokwapho g'ọ dụ l'ẹhu unu; eshinu iphe-oma, shi l'ẹka Unme-dụ-Nso agụ unu agugu; unu kukebe ẹhu g'ọ dū unu shi l'ẹhu; g'oo-bukwanuru iphe-oma, a-nodu emetse Chiochi emetse.

¹³Oo ya bụ; g'onye epfu opfu l'olu Unme-dụ-Nso; pfujekwapho nū Chileke g'ọ nū iya ike g'o gudeje kọo ya g'a maru iphe, oopfụ. ¹⁴Lẹ teke mu epfu l'olu Unme-dụ-Nso; bẹ bụkwa obu mu bẹ epfu anụ Chileke; ophu iphe, oopfụ edokwanuru mu ẹnya. ¹⁵?Bukwanu gunu ozo bẹ gbaru mu lememe? Mu e-gude Unme-dụ-nso epfu anụ Chileke; agụ ebvu, doru ẹnya. ¹⁶L'ọ -buru l'ija Chileke ajaja l'olu Unme-dụ-Nso; ?denu g'onye ozo, nọ l'ẹka ono iphe, iipfu edoduru ẹnya e-me sụ: “Nokwa g'ọ dū” l'ajaja iija;

eshinu ọ madu iphe iipfu? ¹⁷Iinodukpokwa ekele ekele rengurengu; ọle o too metsedu onye anu iya nu.

¹⁸Mu ekele Chileke ekele le mbedua l'onwomu kakota unu epfu opfu l'olu Unme-du-Nso. ¹⁹Ọle o -beta ge mu nodu le Chiochi gude olu Unme-du-Nso pfua unubuku opfu; mu ahatachia epfu nwakpuru opfu ise, doru enya gude ezi ndu ozo iphe.

²⁰Unwunna mu; unu ta arijeshinu oriri g'unwegirima nshii. Unu dujekwa ge nwaswa me a -bya l'eme ejo-iphe. Teke a byaru l'egomunggo; unu enweru egomunggo ogerenya. ²¹Lekwo ekemu be e dekwaru su:

“Mu e-gude opfu ndu ali ozo,
dugbaa iche iche;
me opfu ndu ohantsu gude
pfuru yeru ndu nkemu.
Ọle o to bukpodanu l'ephe
angabe nchi l'iphe,
mu epfu.^d”

Nokwa iphe, Nnajiuphu eepfu. ²²Ọo ya bu l'epfu opfu l'olu Unme-du-Nso bu iphe-ohubama, duru ndu ekwedu ke Kereshi; o to budu ke ndu kweru ke Kereshi. Ophu epfuchiru Chileke abukwa ke ndu ekwedu ke Kereshi; o kwa ke ndu kweru nkiya.

²³Ọo ya bu le-a; teke Chiochi l'ophu dzukoberu; onyemonye tuko epfu opfu l'olu Unme-du-Nso; ndu shi eshishi; ozo ndu te ekwedu ke Kereshi byapfuta unu; ?ndu ono taa sudunu l'oo obvu be eme unu? ²⁴Obenu teke o bu l'onyemonye be epfuchiru Chileke; onye ete ekwedu ke Kereshi; ozo onye shi eshishi bya abata; ?ti madu l'iphe ono, onukota ono be anodu erwu iya lehu; enya agbarwua ya l'iphe-eji, o meshiru. ²⁵Iphe ono, onu ono aturu iya iphe, ori l'egomunggo jala. Ọo ya bu; onye ono adaa kpurumu l'ali wata abaru Chileke aja; watakwapo epfu su: “O bukpo o kpobe-opfu; unu le Chileke nopho leka-a.”

Iphe, eeme ememe le Chiochi

²⁶Su-a; unwunna mu; ?o du unu g'o bu gunu be mu epfu? Teke unu be Chiochi dzukoberu; onye egude ebvu-oma; onye egude opfu Chileke ezi iphe; onye aphu ophulenya; onye epfu opfu l'olu Unme-du-Nso; onye ako iphe, opfu Unme-du-Nso ono bu. G'onye eme ophu oome mee ya g'o buru iphe, ee-gude emetse unu emetse. ²⁷O -buru l'o duru ndu epfu opfu l'olu Unme-du-Nso; g'o buru-a nwumadzu ebo; ozo eto kpekpu; o l'oo g'onyenonu pfuje nkiya me o -rwube iya. G'onye lanu le g'unu ha ko iphe, opfu. ²⁸Teke o bu l'o to dudu onye ako iphe, o bu g'ephe tukokwa dobegbaa onu doo le Chiochi; g'onye ophu nonu pfujeekwapo nu onwiya

^d 14:21 Guna Azá 28:11.

pfukwapho nū Chileke. ²⁹Gē ndu epfuchiru Chileke dukwapho ẹbo; ọzoo ẹto pfua; ndu ọphuu elerwee iphemiphe, ẹphe pfuru ẹnya. ³⁰Teke ọ bụ l'onye ọzo, nọ lẹ ndzukọ l'ẹka ono wataru ọphulenyā; g'onye kẹ mbu pho, shi epfu opfu pho dobeekwapho ọnu doo. ³¹Unu a-dukwa ike epfuchiru Chileke nanu nanu; g'e-shi g'oniyemonye anwuta iphe; teme Unme Chileke eyekwarupho oniyemonye ọku g'obu shihu iya ike. ³²G'onye epfuchiru Chileke dukewa ike sedeje onwiya me ọ -nodu epfu iya. ³³Lẹ Chileke ta abukwa onye mkpaka; ọ buchikwaa onye nchi-odu-doo; bu iya bu g'ọ du-gbaa l'iphe, bukpo ndzukọ ndu-nsọ l'ophu.

³⁴Unwanyi unu dobejekwa ọnu doo lẹ Chiochi. Unwanyi be e te kwekwa g'ẹphe pfuje opfu me ndu Chiochi dzukobe. Ọ chia g'ẹphe wozeje onwophe ali; lo noo iphe, ekemu pfuru bu onoya. ³⁵Ọ -buru l'o nweru iphe, agu phe amaru; ẹphe -laa unuphu; ẹphe akpataje ji phe ishi iya. Lọ bu iphe-iphere kẹ gẹ nwanji pfujeru l'ẹka Chiochi dzuru edzumoke epfu opfu. ³⁶Mu sūru; ?ọ du unu g'ọ bu l'ẹka unu be opfu Chileke shi? Too ?bu unu beberu nūma-sweru opfu Chileke? ³⁷G'onye riru lẹ ya bu onye epfuchiru Chileke; ọzoo lẹ ya nataru iphe-oma, shi l'ẹka Unme-du-Nso; g'o doo onye ono ẹnya l'iphemiphe-a, mu ederu unu-a bu ekemu, shi l'ẹka Nnajiuphu. ³⁸Onye agubeduru iphemiphe-a iphe; g'a ta agubekwapho onye obu iphe.

³⁹Ọo ya bu; unwunna mu; g'ọ guje unu ẹgu epfuchiru Chileke. Ọphu unu akposhijekwa epfu opfu l'olu Unme-du-Nso. ⁴⁰Ọo 'epho g'e meje iphemiphe g'ọ gbaru waa lo rwuberu iya.

Eshi l'onwu teta kẹ Kéreshi

15 ¹Unwunna anyi; nta-a bu gẹ mu bya anyatabaaru unu k'ozima ono, mu zihawaru unu ono. Ozi-oma ono be unu nataru; ọ buru iya meru iphe, ekwekwe, unu kweru kẹ Kéreshi shihuru ike. ²Ọo ya bu l'ẹ gude ozi-oma ono adzọo unu; mbukwa me unu -gudeshia ya ẹka ike gẹ mu ziru iya unu; gbahakwaa l'ekwekwe, unu kweru te enwedu ishi.

³Iphe ono, kachaa mkpa, e yeru mu l'ẹka; mu zia unu ono; teme ọ buhukwarupho iphe, e dehawaru l'ekwo-opfu Chileke l'o noo g'odo-du bu ono; bu lẹ Kéreshi nwuhuru opfu l'anyi meru iphe-aji. ⁴E lia ya; o rwua lẹ mboku k'eto Chileke kulia ya. Ọ bukwarupho g'e dehawaru iya l'ekwo-opfu Chileke. ⁵Lẹ Pyita humakpooru iya; ndu-ishi-ozu iri l'ẹbo pho humakwa iya pho. ⁶E mechaa unwunna anyi ndu ghataru unu nemadzu l'ukporo umadzu ise huma iya lẹ mgbo lanu. Ndu k'ono hagbaru tukọ nodukwadua ndzu nta-a; ọle o nwekwaru-a ndu ophu haru nwuhuwaa nu. ⁷E mechaa; Jiemusu bya ahuma iya; ndu-ishi-ozu ophunapho g'ẹphe ha humakwa iya pho.

⁸O be l'ikpazu iya; mbedua l'onwomu huma iya. Mbedua duwaa gẹ nwa a nwuru lẹ teke ọ kaduru akaka; ⁹noo l'ọ kwa mbedua be ẹnya kachaa

alwalwa l'iphe, bukpoò ndu-ishi-ozì Jizòsu l'ophu; mbù lè mu ta agbakpò-daaru nù g'ee-ku mu onye ishi-ozì Jizòsu; kèlè mu shì akpajè Chìochì kè Chileke èhu. ¹⁰Obenu l'e shì l'eze-iphe-òma kè Chileke, mu bùru onye-a mu bù-a; òphu eze-iphe-òma onò, Chileke meru nù mu onò abùdu iphe-mmanù. Mu gbèchianu bya akakòta ndu-ishi-ozì òphuu g'èphe ha ejeshì ozì ike; e gudekpòro l'ò tò bùdu mu meru iya l'onwomu; l'òò eze-iphe-òma Chileke reru ire l'èhu mu. ¹¹Òò ya bù; m'ò bù mu zìru unu ozì onò; m'ò bù èphebedua-o; òò iphe lanù onò bè unu kwetarù.

Eshi l'ònwu teta k'anyi

¹²Sù-a; ò -bùru l'ozì-òma onò bù lè Kéreshì shì l'ònwu teta dzùru ndzù; ?dènuhunù g'ò gude unu gbè harù sù l'e tee shìdu l'ònwu eteta? ¹³Teke ò bù eviya lè ndu nwùhuru anwùhu tee shìdu l'ònwu eteta; ò n'ìya-a bù lè Kéreshì te etetadùru. ¹⁴Teke ò bukwanu lè Chileke te emeduru Kéreshì g'ò shì l'ònwu teta dzùru ndzù; ò n'ìya bù l'iphe onò, anyì ezi onò bù iphe-mmanù; ekweta, unu kwetarù kè Kéreshì bukwarupho iphe-mmanù. ¹⁵Ò tò bùdua iphe-mmanù kpù; obenu l'onò egoshìfua l'anyi adzù ùka atù-kobe Chileke eshinu anyì epfu l'òò Chileke meru Kéreshì o shì l'ònwu teta dzùru ndzù. E -mechaa; òphu Chileke emeduru ndu nwùhuru anwùhu èphe teta dzùru ndzù eviya; ò n'ìya bù l'anyi dzùru ùka. ¹⁶Teke ò bù lè Chileke tee medu ndu nwùhuru anwùhu g'èphe teta dzùru ndzù òzò; ò n'ìya bù lè Chileke te emekwarupho Kéreshì g'ò shì l'ònwu teta dzùru ndzù. ¹⁷Teke ò bukwanu lè Chileke te emeduru Kéreshì g'ò shì l'ònwu teta dzùru ndzù; bù n'ìya bù l'ekweta, unu kwetarù kè Kéreshì bù mkpòkoro iphe, enwedù ishi; tème iphe-èjì, unu meshìru dükwapò unu l'èhu g'ò dù iya. ¹⁸Ò n'ìya bukwapò lè ndu onoya, èphe lè Kéreshì tughbaru tème èphe nwùhu onò bè lawarù l'iswì. ¹⁹Òme èka anyì eleberu ènya iphe, Kéreshì e-meru anyì bù lè ndzù-a, anyì nò nta-a kpùrumu; mè anyì a-bukwaru ndu gege akachaa agba k'akùru òshì lè mgboko-a.

²⁰Obenu lè Kéreshì shìwaa l'ònwu teta dzùru ndzù. Ò bùwaru iya bù onye mbù lè ndu nwùhuru anwùhu, e-shì l'ònwu teta. ²¹Ò kwa g'ònwu shì l'èka nwoke lanù barahù bukwapò g'eteta l'ònwu e-shì l'èka nwoke lanù vuru ire. ²²Òò gè nemadzù mgburugburu anwùhujè; kèlè èphe shì l'èhu Ádamu bukwapò g'iphe, bù ndu èphe lè Kéreshì tughbaru bùru nanù e-nweru ndzù òphúú. ²³Obenu l'on'yemonye e-teta nòdu ndzù mè o -rwubèè ya phò; Kéreshì, bù iya bù onye mbù-a vuwaa ùzò; ndu bù ndu kè Kéreshì etsota iya mè ò -byaèpho. ²⁴E -mechaa; l'a byarwuta lè teke ikpazù, bù teke Kéreshì e-woru ike, o gude bùru eze ye Chileke, bù Nna l'èka; teke onò bè oo-mewaa g'ìke bvùkota iphe, bukòtakpoo òchì-òha mè ò-nò-l'òke-òkwa mè o-gude-ìke g'èphe ha. ²⁵Òlè Kéreshì bufutajè eze, ndu mgboko l'ophu jasù teke Chileke e-me iya g'ò zòpyabè ndu òhogu iya l'òkpa. ²⁶Iphe, bù òhogu ikpazù, oo-mebyì ìrè iya bù ònwu. ²⁷“L'ò meakwaru ò

zopyabe iphemiphe l'okpa iya.” Ophu doru ɛnya bụ l'a -sụ l'ọ zopyaberu “iphemiphe” l'okpa bẹ a gụfuru Chileke; mbụ onye ono, meru ọ zopyabe iphemiphe l'okpa obu. ²⁸Teke Nwa kẹ Chileke buepho ishi iphemiphe; noo teke oo-woru onwiya woru ye Chileke ono l'ẹka; mbụ onye ono meru g'ọ bụru ishi iphemiphe ono; k'ophu Chileke a-bụru ishi iphemiphe.

²⁹Ọ -bụru l'e tee shidu l'onwu eteta; ?ee-mekwanụ ndu ono imeagha? mbụ ndu ono, e meru baputizimu l'iswi ẹhu ndu nwuhuru anwuhu ono? Ọ -bụru lẹ ndu nwuhuru anwuhu te etetadu ililekpoo; ?buhunu gunu meru g'o gude a nodu eme baputizimu l'iswi ẹhu ndu ono? ³⁰?Bụ gunu meru g'o gude anyi nodu anoduje alo ishi anyi alo tekenteke? ³¹Unwunna mu; ọ kwa eku onwomu, mu egudeje unu eku k'atugba, anyi l'unu tugbaru lẹ Kéreshi meru g'o gude mu nodu epfuru iya unu sụ lẹ mu anodujekwa ala maa mboku-mboku. ³²Ọ -bụru lẹ mu l'ejo anu-egbudu lwuru ogu lẹ Efeso ọ bụru nemadzu bẹ mu alwodoru iya; ?bụ gunu bẹ mu ritaru iya? Ọ -bụru lẹ ndu nwuhuru anwuhu tee shidu l'onwu eteta; “G'anyi watanu eri g'ọ dū anyi; ngu g'ọ dū anyi; o -be echele; anyi anwushihunu.”

³³Unu te ekwekwa g'e dephua unu. “Ọ kwa ẹjo oswi emebyi ama onye.” ³⁴Ophu g'egomunggo lwadupho unu azu; g'unu ahaa eme iphe-iji wata eme iphe, pfuru oto. Iphe, mu epfukwa owa-a bukwa g'iphere kabe dū unu. L'o nwekwaru g'unu ha ndu ophu amadu Chileke ililekpoo.

Ogwehu, ee-gude shi l'onwu teta

³⁵O nweru onye a-gbeshi l'ọ jia sụ: ?Denukpoo gẹ ndu nwuhuru anwuhu e-shi teta dzuru ndzu? ?Bụ ogwehu dū idagha bẹ ephe e-nweru m'ephe teta obu? ³⁶I bukwanu onye-eswe! Iphe, i koru l'alị te erwutajekwa ozo gbahaa l'o rehuru ẹwa ³⁷Ozo bụ l'ọ tọ bụdu g'iphe, a kuru l'alị aduje mẹ o -vugheepho bụ g'ooduje teke anyi kuru iya. Iphe, akuje bukwa akpuru iya; mbụ dū g'akpuru akpe mẹ akpuru-iphe ozo, dugbaa l'udu iya l'udu iya. ³⁸Ole Chileke egudeje ẹka iya meru ugbugba nū iya g'ọ dū yebe Chileke ree; ọ nūje akpuru iphemiphe ugbugba, gbaru iya nū.

³⁹Anuehu iphemiphe ta agbadzukwaru nanu. Nemadzu nweru anu-ẹhu nkiya; anu nweru nkiya; ẹnu nweru nkiya; ẹma nweru nkiya.

⁴⁰Iphe, dū l'imigwe nweru ugbugba nkiya. Iphe, dū l'alị nweru ugbugba nkiya. Ole biribiri k'ugbugba iphe, dū l'imigwe bẹ dū iche; biribiri k'ugbugba iphe, dū l'alị dukwapho iche. ⁴¹Enyanwu nweru biribiri nkiya iche; onwa nweru nkiya iche; nokwapho gẹ kpokpode nweru biribiri nkiya. Kẹ kpokpode bụ l'o nweru ophu akaje ibe iya ekeke.

⁴²Nokwapho g'oo-dū teke ee-shi l'onwu teta dzuru ndzu. Ehu nemadzu rehuru erehu teke e yeru iya l'alị. Ole teke oo-teta dzuru ndzu bẹ oo-buru iphe, tee rehubaedu erehu. ⁴³E liru iya teke ọ dū ideyideyi; ole o -teta bẹ oo-dū biribiri l'anya. E liru iya teke ike adudu iya; ole teke oo-teta bẹ ike a-dū iya. ⁴⁴E liru iya teke ọ bụ ogwehu mmanu; teke o-shi l'onwu teta bẹ

õo-buru ogwehu, shi l'eka Unme Chileke. Ogwehu mmanu dukwa; ogwehu shi l'eka Unme Chileke dukwapho. ⁴⁵Le dekwaru l'ekwo-opfu Chileke su: "Onye ivuzo, bu Adamu be e meru o buru nemadzu, dzu ndzu." O bya emee Adamu k'ikpazu, o buru unme, emeje g'anodu ndzu. ⁴⁶O to bukwa ugbugba, shi l'imigwe evujeru uzo; o kwa ugbugba k'eliphe evujeru uzo; k'imigwe etsota iya. ⁴⁷Nwoke mbu be e gude aja, shi l'ali mee; nwoke k'ebho shikwanu l'imigwe. ⁴⁸Oo ge nwoke mbu pho e gude aja, shi l'ali mee pho du; bu g'iphe, bu ndu e gude aja, shi l'ali mee dukota. O buru ge nwoke ophu shi l'imigwe du; bu ge ndu k'imigwe a-dukotakwapho. ⁴⁹Oo 'epho g'anyi yeru onye k'ono, e gude aja, shi l'ali mee ono bu g'anyi e-ye onye k'imigwe.

Teke Kereshi l'a-bya ozo

⁵⁰Unwunna mu; iphe, mu e-pfufuaru unu bu; iphe, nweru anu-ehu bya enweru mee taa bahukwa l'eka Chileke bu eze. Ophu iphe, erehuje erehu ta anojekwa je aduwaruro aduru. ⁵¹Unu ngabe nchi ge mu kooru unu iphe, e shi domia edomi. G'anyi ha taa nwuhugbukwa; obenu l'aa-gbanwegbukotakwanu anyi ⁵²le ntabu-anya lanu me e -gbuepho opu-ogu ono, ee-gbu gude goshi le teke ikpazu ruwaru ono. Teke e gbuerupho opu ono; ndu nwuhuru anwuhu etetakota dzuru ndzu ozo; k'ophu ephe taa nwuhubaedu anwuhu; lo gbanwekwaapho anyibedua. ⁵³Iphe, unu amaru bu l'ogwehu owa-a, l'e-rehu erehu-a; chitafutajekwa ogwehu ophu tee rehuhedu erehu woru kpube onwiya. Ogwehu owa-a, l'anwuhuje anwuhu-a chitajekwapho 'anwuhu anwuhu kpube onwiya. ⁵⁴Teke ogwehu-a, l'e-rehu erehu-a chitaerupho ogwehu ophu tee rehudu erehu kpube onwiya; ogwehu owa-a, l'anwuhu anwuhu-a chita ophu taa nwuhudu anwuhu kpube onwiya; noo teke iphe ono, e deru ono a-vu g'e deru iya. O pfuru su: "Onwu be emekpewaru; lwua ya ree."

⁵⁵Gube onwu ?denuhunu

ogba-kpii ngu obu?

Gube ilu; ?denuhunu iphe,

iigudeje emekpe ndzu?^e

⁵⁶Anwuhu be ogba-kpii ya bu iphe-eji; ike k'iphe-eji bukwanuru ekemu.

⁵⁷Ole-a; Chileke dukwa ike; yebedua meru g'anyi gb'e l'eka Nnajiuphu anyi, bu Jizosu Kereshi lwu-kpee iphemiphe ono.

⁵⁸Noo go gude mu su: unube unwunna mu, mu yeru obu; unu kpo onwunu g'abara. Unu pfuru pfushia ike; te ekwekwa g'e mee unu g'unu te etete. G'eka unu kangojeekwapho l'ejeru Nnajiuphu ozi, nyiberu anyibe tekenteke; eshinu unu maru l'akanya, unu no l'eka Nnajiuphu ese ta abudu akanya ola-l'iswi.

^e 15:55 Guna Hos 13:14.

Okpoga, e gude eyeru ndu kẹ Kéreshi ẹka

16 ¹A bya l'okpoga ono, unu gude obu unu anu ndu kẹ Chileke lẹ Jierúsalemú ono; mu sù g'unu meje iya ẹgube ono, mu ziru Chìochi, nọgbaa lẹ Galeshiya g'ẹphe meje iya ono. ²Iphe, bụ Sonde, a-nwúta nù g'onyenonu wofutajẹ iphe gẹ Chileke mekpọerupho o nweberu iphe; woru kwakọbeje iche; g'ọ tọ bụepho mu -bya tẹmanu unu agbẹ teke ono nakọahaa ya. ³Teke mu byaerupho; mu ederu ẹkwo nù ndu unu a-họta g'ẹphe gude iphe ono, unu nùru ono wolaa Jierúsalemú. ⁴Teke ọ bụ l'ọo iphe, gbaru k'ọphu mu e-je; mu l'ẹphe aswìru jeshia.

Iphe, Pọlu rìru k'ememe

⁵Mu a-kpapfutakwaa unu mẹ mu -shiepho alì Masedoniya; lẹ mu arìkwa k'eshita ẹka ono. ⁶Uzo -dù; mu l'unu anọduwaro mẹ mu -bya; ọzoo mu a-nọkpoonu udzumini ono; g'unu edukwanaa mu ije gẹ mu jeshia ẹka bukpoọ ẹka mu eje. ⁷Lọ -bùru nta-a, mu aghabu aghabu-a bẹ ọ tọ dukwa mu g'a sù lẹ mu l'unu humaru. Mu arì lẹ mu -byaepho bẹ mu l'unu a-nwọdu mẹ ọ -bunuru lẹ Nnajiuphu kweru.

⁸Ọle mu a-nọdu lẹ Efesoosu jasù l'ọbo Pentikosutu. ⁹Lẹ Chileke gbuhaa-kwaru mu ọzo ọkpobe egbuha gẹ mu jee ozi, e-ye ẹka shi; tẹme ndu l'eme g'ẹphe kposhia mu iya dù igwerigwe.

Timoti yee Apolosu

¹⁰Teke Timoti byaru; unu letakwa ẹnya mee ya g'ọ túsaru ẹhu. L'unu maru l'oojeru Nnajiuphu ozi gẹ mu eje-a. ¹¹Ọo ya bụ lẹ-a; g'ọ tọ dukwa onye a-nma iya phulaphula. Unu dukwaa ya ije; g'oogude ẹhu-utso lwa; lẹ mu elekwa ẹnya lẹ yẹle unwunna anyi ndu ophuu l'a-tuko swìru lwa.

¹²Ọ -bùru kẹ Apolosu; mbukwapho onye k'ono, anyi l'iya tukokwarupho ejeru Nnajiuphu ozi ono; mu pfushikwaru iya ike sù iya gẹ yee unwunna anyi ndu ophuu tuko swìru kpapfuta unu; ọle ọ tọko dudu iya g'ọ bya nta-a. Ọo-bya mẹ ọzo duleru iya phọ.

Opfu, Pọlu gude akpọchi iya ishi

¹³Sù-a; unu kwabejekwa ẹnya; unu apfuru pfushia ike lekwekwe, unu kweru kẹ Kéreshi; unu mejekwa gẹ nwoke l'iphe, bukpoọ iphe, unu eme ememe; unu eshihukwaphọ ike. ¹⁴Unu gudeje n-yemobu meje iphemiphe, unu eme ememe.

¹⁵Unwunna mu; ophu unu maru bụ l'ọo Sutifanasu yee ndibe iya bẹ bụ ndu e vuchaa ọzo pfuta yeru Kéreshi l'alì Gurisu; tẹme ẹphe hofutawaa onwophe dobe; sù l'ẹphe a-nọdujeepho eyeru ndu-nsọ ẹka. ¹⁶G'ọ bukwaru egube ndu ono bẹ unu e-meje iphe, ẹphe pfuru. Nokwaphọ g'unu e-meje k'iphe, bukpoọ ndu ẹphe l'ẹphe gba mgba eje ozi bya esekwaphọ akanya ono.

¹⁷Ehu atso mu uto le Sutifanasu yee Fochiunetoso me Akayikosu be byaru nu; kele iphe, unu gege eme be ephe mekotawaru. ¹⁸Ephe mewaru g'ehu ka mu ebvuru ebvuru bya akakwapho unubedua. Oo egube ndu ono be a-dujeru unu le nso.

¹⁹Ndu Chiochi Eshiya l'ekelekwapho unu-o. Akwila yee Pirisila me ndu Chiochi, l'edzukoje l'ulo phe gudekpoo obu phe ekele unu ekele; mbu unube ndu unu l'ephe tugbaru le Kereshi buru nanu. ²⁰Iphe, bukpoowunwunna anyi l'ekelekota unu ekele.

Unu ekelekwapho nwibe unu ekele nmata phe akpa, du nso.

Ekele, shi l'eka Polu

²¹Ekele owa-a bukpoowaa mbedua, bu Polu ede iya l'onwomu ekele unu.

²²G'onye ete eyeduru Nnajiuphu, bu Jizosu Kereshi obu; bukwaru onye a turu onu. Marana ta!^f

²³Ge Nnajiuphu, bu Jizosu kereshi meeru unu eze-iphe-oma.

²⁴Mu yekotaru unu obu g'unu ha opfu l'anyi l'unu tukoru tugba le Kereshi, bu Jizosu. Nokwa g'o du.

^f 16:22 Iphe, Marana ta futaru l'opfu ndu Aramu bu: Jiko; bya Nnajiuphu!